





樂城集卷之九

宋西蜀蘇轍子由著

明東吳

王執禮子

顧天叙禮初

全校

詩七十首

春日耕者

陽氣先從土脉知老農夜起飼牛飢雨深一尺春耕
利日出三竿曉餉遲婦子同來相嫵媚烏鳶飛下巧
追隨紛紜政令曾何補要取終年風雨時

自栢城還府馬上

春色無人見茲行偶衆先柳黃新過雨麥綠稍鋪田

河潤兼冰散禽聲向日圓城池高受霧濼渙暖生煙
送客情初惡還家意稍便旋聞夫事起已過佛燈然
簿領何時畢塵埃空自憐南湖漸可到早治木蘭船

次韻子瞻人日獵城西

將賢士氣振令肅軍聲悄晨登戲馬臺一試胡騶裹
城空巷無人里社轉相曉吾公庶無疾但恐園囿小
荆榛一焚蕩雉免皆驚矯翩翩白馬將手把青絲挑
少小事邊徼斬刈輕茶蓼殿前賜鞍勒珂月明皎皎
自言得所事強暴無不了廟筭本詩書下策禁焚燎
當今百鍊剛其就一指繞低回未嘗試坐被世人少

秋霜一朝下凌厲見鷲鳥爲君整驕惰重立穰苴表

送鮮子子駿還朝兼簡花景仁

蜀中耆舊今無幾相逢握手堪流涕勸遊潦倒不還
家舊俗陵遲真委地錢荒粟帛賤如土權峻茶鹽不
成市詩書鄉校變古法節行故人安近利欲歸長恐
歸不得歸去相歡定幾疋低徊有似羊觸藩眷戀僅
同雞擇米中山先生昔所愛南都攝尹私相喜窮冬
夜長一事無燈火相從夜深睡讀書萬卷老不廢感
寓百篇深有意俗吏惟知畏簡書窮途豈意逢君子
春風歸騎忽西顧平日高談應且止朝騎疋馬事朝

謁莫就一床尋夢寐猶有城西范蜀公買地城東種
桃李花絮飛揚酒滿壺談笑從容詩百紙紅塵暗天
獨不知白首相看兩無愧古人避世金馬門何必柴
車返田里

次韻秦觀見寄

東家有賢人西家苦相忽幽蘭委冰霜掩靄特未發
春風吹芳蕤爛漫安可沒東南信多士人物世不闕
考槃溪山間自獻耻干謁誰憐幽閒女艷色比南越
垂耳困鹽車捐金空買骨讀書謝世事閉門動論月
予生亦羈旅處世常卒卒誰令釣竿手強復此持笏

惟餘七尺軀空洞中無物時蒙好事過解榻聊一拂
野情樂江海夢想扁舟兀隱居便醉睡世路多顛蹶
榮華一朝事毀譽百年歇相勸沐咸池陽阿晞汝髮
次韻道潛見寄

蕭蕭華髮映衰容慙愧高僧歎不逢遊宦終身空處
處塵埃何日退重重已甘憔悴雞羣鶴猶勝劬勞早
歲龍回首不堪膏火熱試求甘露洒青松

次韻王鞏元日

庭鵲營巢初一枝餘寒未便夾羅衣春風娜娜還吹
霰歲事駸駸已發機上國遨遊誰信老中年情味祗

思歸和詩應覺添新懶過盡長空鴈北飛

送將官歐育之徐州

輕衫駿馬走春風未識彭城氣象雄
青山只在白門外明月盡屬黃樓中
五斗濁醪消日一雙鳴鏑戲晴空
歸來笑殺幕府客閉戶看書

次韻答王鞏

君家當盛時畫戟擁朱戶中書
形容畫雲閣功業載盟府中
子孫盡豪俊豈類世寒窶胡
遁厄黽俛受侵侮往來兩都間
奔走未安土願解纓紱歸去事農圃

嘉禾根未拔且忍俟甘雨拂衣走東臯此語吾不取

聊復放襟懷清談對僧麈躬耕未可言知田顧乃父

次韻子瞻過淮見寄兼簡孫奕職方三首

出處平生共江淮恨不來宦遊良誤我老病賦懷哉
狗物終今世量書盡幾堆歸耕少憂患惟有仰春雷

蜀中謂田無水利者為雷鳴田

其二

龜山昔同到松竹故依然紅印封鹹豉黃罌分井泉
青天攜杖處晚日落帆偏無限相思意新詩句句傳

其三

行役饒新喜臨川逢故人相看對泉石憐我在埃塵
 會合終多故分張類有神南遊得如願夢想雪溪春
 次韻王鞏留別
 決策歸田豈世情網羅從此脫餘生請君速治雞黍
 具待我同為沮溺耕秋社相從釀錢飲日高時作叩
 門聲茅廬但恐非君處籍籍朝中望已傾

次韻答孔武仲

白髮青衫不記年相逢一笑斲欣然誦詩疊疊鋸木
 屑展卷駸駸下水船未肯尺尋分在直日知鑿柄有
 方圓閑官更似揚州學猶得昏昏晝日眠

送傅宏著作歸覲待觀城闕

膠西前輩鄭康成千載遺風及後生舊學詩書儒術
 富兼通法律吏能精還家綵服頻為壽得邑河壻喜
 有兵民事近來多迫促弦歌聊試武城聲

律有鄭氏章句

連雨不出寄張恕

麥熟蠶繅熱似烝雨傾三尺未為淫洗清溝澮蚊蚋
 靜沒盡蒲蓮沼沚深遺秉滿田驚朽腐移牀避漏畏
 侵尋高閑祗有張公子臥聽蕭蕭打葉音

和子瞻自徐移湖將過宋都途中見寄五首

東武厭塵土彭門富溪山從兄百日留退食同躋攀

帆過百步船底驚雷翻肩輿上南麓眼界涵川原
以此忽忘歸願兄且三年我去已怱怱兄來亦崩奔
永懷置酒地遶郭多雲煙

我昔去彭城明日河流至不見五斗泥但見三竿水
驚風鬱颯怒跳沫高睥睨歛灩三月餘浮沉一朝事
分將食魚鼈何暇顧隣里悲傷念遺黎指顧出完壘
繚堞對連山黃樓麗清泗功成始逾歲脫去如一屣
空使西楚氓欲語先垂涕

千金築黃樓落成費百金誰言史君侈聊慰楚人心
高秋吐明月白壁懸青岑晃蕩河漢高恍恨窻戶深
邀我三日飲不去如籠禽史君今吳越雖往將誰尋
欲買爾家田歸種三頃稻因營山前宅遂作泗濱老
竒窮少成事飽暖未應早願輸橐中裝田家近無報
平生百不遂今夕一笑倒它年數畝宮懸知迫枯槁
梁園久蕪沒何以奉君遊故城已耕稼臺觀皆荒丘
池塘塵漠漠鴈鶩空遲留俗衰賓客盡不見枚與鄒
輕舟舍我南吳越多清流

次韻劉貢父登黃樓懷子瞻二首

青山開四面白水遶三禺野闊時聞籟人閑舊據梧
畫船留上客遺迹問田夫事少日常飲才疎世未須

决河初荐至勝事偶相俱燕子卑無取滕王遠可樵
飛濤隱睥睨落日麗浮圖同舍新持節專城敢遽呼
未遯行部駕已放下淮艫試問登消暑如何楚與吳

吳興有消暑樓

再和

藹藹才名世駸駸日轉禺一時同接浙平昔共棲梧
攬轡真壯士擁旄良丈夫塵埃脫緇綬水石慰霜須
勝地來相失清樽未暇俱射餘空見帖鑄罷祗觀撫
歸計何當决徂年貴早圖檻中終爲食鞴上耻聞呼
顧我千羊毳平生一釣鱸微官不須滿也復試遊吳

陪杜克張恕鴻慶宮避暑

至後雨如瀉晴來熱更多簿書霑汗垢巖石思藤蘿
賴有祠官靜時容俗客過老郎無不可公子亦能和
道勝還相接禪迷屢見訶清凉生絕念煩暑散沉痾
古木便張幄鳴禽巧當歌桃香呈絳頰瓜熟裹青羅
飯細經脣滑茶新到腹適劇談時自笑飽食更無它
適意未應厭後遊真若何官居鄰曲沼田畎助清波
晚照明疎柳微風響衆荷輕舟尚可載小雨試漁蓑

宋城宰韓秉文惠日鑄茶

君家日鑄山前住冬後茶芽麥粒麓磨轉春雷飛白

雪甌傾錫水散凝酥谿山去眼塵生面簿領埋頭汗
匪膚一啜更能分幕府定應知我俗人無

次前韻

龍鸞僅比閩團醜鹽酪應嫌北俗龕採愧吳僧身似
脂點須越女手如酥舌根遺味輕浮齒腋下清風稍
襲膚七盃未容留客試瓶中數問有餘無

答孔武仲

飛霜委中林不廢長松綠驚風振川野未省勁草伏
我貧客去盡君來常不速愧君贈桃李永願報瓊玉
我性本山林苦學筆空秃驂騮塞康莊病足顧難逐

錦文絳華藻弊褐非所續家有五車書恨不十年讀
濟南昔相遇我齒三十六談諧傾蓋間還往白首熟
從君飲濁酒過我飯脫粟西湖多莢亂白晝下鴻鵠
城西野人居柴門擁修竹後車載鴟夷下馬瀉醺醪
醉眠臥荒草空洞笑便腹疎狂一如此豈望世收錄
別來今幾何歸期已屢卜西南有薄田茅舍清溪曲
耕耘三男子伏膺當自足君能遠相尋布衣巾一幅
送吳思道道人歸吳興二絕

一去吳興十五年東歸父老幾人存惠山唯有錢夫
子一寸閒田曉日曛

遨遊海上冀逢人
宴坐山中長閉門
去住只今誰定
是相逢一笑各無言

次韻答陳之方祕丞

南山李將軍足馬獨行獵
田中射虎豹後騎不容躡
丈夫貴自遂老大饒驚懾
飄搖天地間自視如一葉
故人多東南願作扁舟涉
忽蒙長篇贈幸此傾蓋接
時世尚新奇詩書存舊業
南風吹清汴西去無停楫
恨不留君談一使衆坐厭
新詩苦清壯欲和再三怯
東都多名卿投刺日盈笈
一言苟合意富貴出旬浹
行看文石階高談曳長袂
辱贈但茫然知君念疲薾

登南城有感示文務光王適秀才

幽憂隨秋至秋去憂未已
城南試登望百草枯且死
落葉投人懷驚鴻四面起
所思不可見欲往將安至
斯人定誰識顧有二三子
清風皎冰玉滄浪自湔洗
竊脂未嘗穀南箕儻微似
網羅一張設投足遂無寄
田深狡兔肥霜降鱸魚美
造形悼前失式微慙往士
憧憧畝丘道歲晚嗟未止
西山有茅屋鉏耰本吾事

張公生日

是歲己未初致仕

少年談王霸英氣干斗牛
中年事軒冕徇世仍多憂
晚歲探至道眷眷懷林丘
今年乞身歸始與夙昔酬

高秋過生日真氣茲一周觀心比孤月視世皆浮
表裏一融明萬物不能留顧謂憧憧人斯樂頗曾不
嗟我本俗士從公十年遊謬聞出世語俛作籠中囚
俯仰迫憂患欲去安自由問公昔年樂孰與今日優
山中許道士非復長史儔腹中生梨棗結實從今秋
次韻答張耒

客舟逝將西日夜西北風維舟罷行役坐令鬢如蓬
偶從二三子步上百尺臺雲煙遍原隰敞恍令人哀
山中難久居浮沉在城郭欲學楊子雲避世天祿閣
浮木寄流水行止非所期何須自爲計水當爲我移

外物不可必惟此方寸心中
有樂事手付瑟與琴
夜吟感秋詩惜此芳物零幽人亦多思起坐再三聽
白駒在空林鉞磬有耻壘盡我一杯酒愁思如雲頽

次王適韻送張耒赴壽安尉二首

綠髮驚秋半欲黃官居無處覓林塘浮生已是塵勞
侶病眼猶便錦繡章羞見故人梁苑廢夢尋歸路蜀
山長憐君顧我情依舊竹性蕭疎未受霜
魏紅深淺配姚黃洛水家家自作塘遊客賈生多感
槩閑官白傅足篇章山分少室雲煙老宮廢連昌草
木長路出高高應少駐孱顏新過一番霜

次韻張耒見寄

相逢十年驚我老，雙鬢蕭蕭似秋草。壺將未洗兩脚泥，南轅已向淮陽道。我家初無負郭田，茅廬半破蜀江邊。生計長隨五斗米，飄搖不定風中煙。茹蔬飯糗不願餘，茫茫海內無安居。此身長似伏轅馬，何日還爲縱壑魚。憐君與我同一手，微官骯髒羞牛後。請看挿一趨府門，何似曲肱眠甕牖。中流千金買一壺，杼中美玉不須沽。洛陽榷酒味如水，百錢一角空滿盃。縣前女兒翠欲滴，吏稀人少無晨集。到官惟有懶相宜，臥看南山春雨濕。

次韻王適兄弟送文裕光還陳

三君皆親非復客，執手河梁我心惻。倚門耿耿夜不眠，挽袖忽忽有難色。君歸使我勞，竟夢落葉鳴塔自相擁。君家西歸在新歲，此行未遠心先恐。故山萬里知何許，我欲因君亦歸去。清江髣髴釣魚船，脩竹平生讀書處。青衫白髮我當歸，咀噍式微慙古詩。少年勿作老人調，被服榮名慰所思。

次韻張芻諫議燕集

淮陽卧閣生清風，梁園坐嘯囹圄空。不知何術解醜髡，但覺羈客忘樊籠。樽壘灑落談笑地，塵埃脫去文

書聚清心漸欲無一事少年空記揮千鍾近傳移鎮
股肱郡復恐入覲明光宮人生聚散不可料一杯相
屬時方冬浮陽似欲作飛霰想見觀闕瓊花中孝王
會集猶可繼莫嫌作賦無枚翁

聖民昔知陳州
余嘗從之遊矣

臘雪五首

長恐冬無雪今朝忽暗空細聲聞軟軟遠勢望濛濛
濕潤猶兼雨傾斜半雜風豐登解多事歡喜助三農

其二

驕陽不能久密雪自相催急霰初鳴瓦飛花旋集臺
着人消瘴疫覆麥長根芟欲試樽中物門前問客來

其三

久有歸耕意西山百畝田雪來殊不惡酒熟自相便
一被簪裳裏長遭羅網牽飛霰迫殘臘愁思渡今年

其四

憂愁不可緩風雪故相撩試問五斗米能勝一束樵
耕耘終亦飽哺啜定誰邀寒暑不須避傾危且自遷

其五

雪霜何與我憂思自傷神忠信亦何罪才名空誤身
歸來聊且止老去莫逢嗔樽酒它年事相看醉此晨

次韻王適雪晴復雪二首

驕陽得一雪踰尺應更好晨興視窓隙驚見晴霞杲
九衢無停迹狼藉須一掃空餘浩然氣凜凜接清昊
餘寒薄虛室一靜解羣燥晨炊晚未供客饋慙草草
試脫身上衣行問酒家保孤吟擊槁木大笑稱有道
人生但如此富貴何用禱所思獨未見耿耿屬懷抱

其二

同雲自成幄飛雪來無根一爲清風卷坐見東方暎
重陰偶復合飛霰滿南軒油然青春意已見出土萱
老病一不堪惟恃濁酒溫開戶理松菊掃蕩無遺痕
卷舒朝夕間誰識造化元乾坤本何施中有神怪奔

萬物極毫末顛倒何足掀老農但知種荷鋤理南園

送呂由庚推官得替還洛中二首

君家相國舊元勳凜凜中丞繼後塵談笑二年同幕
府風流一倍愈它人南都去後少佳客西洛歸來多
老臣我亦宦遊無久意它年松竹許相鄰

洛水留人一向乾雪泥溢路十分寒送行我豈無樽
酒多難君知久鮮歡回首祇應憐老病凌風爭看試
輕翰到家定見嵩陽老問我衰遲未解官

司馬君實
提舉嵩山

崇福
宮

四十一歲歲莫日歌

小兒不知老人意賀我明年四十二人生三十百事
 衰四十已過良可知少年讀書不曉事坐談王霸了
 不疑脂車秣馬試長道一日百里先自期不知中途
 有陷穿山高日莫多棘茨長裾大袖足鉤挽却行欲
 返筋力疲蝮虵當前猛虎後脫身且免克朝饑歸來
 掩卷淚如雨平生讀書空自誤山中故人一長笑布
 衣脫粟何所苦古人知非不嫌晚朝來聞道行當返
 四十一歲不可言四十二歲聊自還

次韻子瞻繫御史獄賦獄中榆槐竹栢

秋風一何厲吹盡山中綠可憐凌雲條化為樵夫束

凜然造物意豈復私一木置身有得地不問直與曲

青松未必貴枯榆還自足紛然落葉下蕭條愧華屋

右榆

盛衰日相尋循環何曾歇攀條擘柔荑回首驚脫葉

綠槐陰最厚零落今存莢千林一枯槁平地三尺雪

草木何足道盈虛視新月微陽起泉下生意未應絕

右槐

故園今何有猶有百竿竹春雷起新萌不放牛羊觸

雖無朱欄擁不見紅塵辱清風時一過交戛響鳴玉

淵明避紛亂歸嗅東籬菊嗟我獨何為棄此北窻綠

右竹

曲如山下藤脆若溪上葦春風一張王秋霜死則已
胡爲南澗中辛勤種栢子上枝撓雲霓下根絞石齒
伐之爲梁棟歲月良晚矣白首閱時人君看柱下史

右栢

次韻子瞻贈張慙子

得罪南來正坐言道人閉口意深全天遊本自有真
樂昇穀誰知定不賢構火噉噉初吐日飛流袞袞旋
成川此心此去如灰冷肯更逢人問復然

過龜山

再涉長淮水驚呼十四年龜山老僧在相見一茫然
僧老不自知我老私自憐驅馳定何獲少壯空已捐
掉頭不見答笑指岸下船人生何足云陵谷自變遷
當年此山下莫測千仞淵淵中械神物自昔堯禹傳
帆檣避石壁風雨隨香煙爾來放冬泝冷沙漲成田
褰裳六月渡中流一帶牽俯首見砂礫羣漁捕魴鱸
父老但驚歎此理未易原何況七尺軀不爲物所旋
衆形要同盡獨有無生全百年爭奪中擾擾誰相賢

放閘二首

畫舫連檣住清流沉閘平忽看銀漢落仍聽夏雷驚

正施遲迴久開頭取次輕滯留初一快奔駛忽如傾
不識風濤恐聊同枕席行行逢賤魚稻飽食慰平生

其二

聞空非有礙水靜爲誰興開閉偶然異喧逐自不勝
淵停初鏡淨勢轉忽雲崩脫隘尚容與投深益沸騰
玉山紛破碎陳馬急侵陵挾版千鈞重浮舟萬斛升
岸搖將落木魚困或投曾洶湧會誰止蕭條遠欲凝
力爭知必折少待亦何能一發臨流笑微言早服膺

次韻王適細魚

羣魚一何微僅比毛髮大嬉遊極草草鬢鬣自箇箇

造物賦羣形偶然如一唾吞舟雖云巨其樂不相過
若言無性靈還知避船施

高郵別秦觀三首

濛濛春雨濕邗溝蓬底安眠晝擁裘知有故人家在
此速將詩卷洗閑愁

筆端大字鴉棲壁袖裏清詩句琢冰送我扁舟六十
里不嫌罪垢汗交朋

高安此去風濤惡猶有廬山得縱遊便欲攜君解船
去念君無罪去何求

召伯埭上斗野亭

細雨添春色微風淨牖流徂年半今世生計一扁舟
飲食隨魚蟹封疆入斗牛江波方在眼轉覺此生浮
次韻鮮于子駿遊九曲池

天高山近海春盡草生池禾黍多新恨川原自昔時
花存故苑麗樵出舊城隳莫望瓜洲渡曾經駐佛狸

楊州五詠

九曲池

嵇老清彈怨廣陵隋家水調繼哀音可憐九曲遺聲
盡惟有一池春水深鳳闕蕭條荒草外龍舟想像綠
楊陰都人似有興亡恨每到殘春一度尋

平山堂

歐陽永叔所建

堂上平看江上山晴光千里對憑欄海門僅可一二
數雲夢猶吞八九寬簷外小棠陰蔽芾壁間遺墨滄
沈瀾人亡坐使風流盡遺構仍須子細觀

蜀井

在大明寺

信脚東遊十二年甘泉香稻憶歸田行逢蜀井恍如
夢試煮山茶意自便短綆不收容盥濯紅泥仍許置
清鮮早知鄉味勝爲客遊宦何須更着鞭

摘星亭

迷樓舊址

闕角孤高特地迷迷藏渾忘日東西江流入海情無

限莫雨連山醉似泥夢裏興亡應未覺後來愁思獨
難齊只堪留作遊觀地看遍峰巒處處低

僧伽塔

山頭孤塔閱真人云是僧伽第二身處處金錢追晚
供家家蠶麥保新春欲求世外無心地一
劫塵方丈近聞延老宿清朝留客語逡巡

題杜介供奉熙熙堂

門前籍籍草生徑堂上熙熙氣吐春遮眼圖書聊度
日放情絲竹最關身年來馮脫烏皮几客去時乾漉
酒巾卜築城中移榜就休心便作廣陵人

遊金山寄揚州鮮于子駿從事邵光

揚州望金山隱隱大如幞榻來長江上孤高二千尺
僧居厭山小面面貼蒼石虛樓三百間正壓江湖白
清風歛霽霧曉日曜金碧直侵魚龍居似得鬼神役
我行有程度欲去空自惜風吹渡江水山僧午方食
波瀾洗我心筍蕨飽我腹平生足遊行壯觀此云極
鐵甕本誰安海門復誰植東南遞隱見遙與此山匹
茲遊幾不遂深愧幕府客歸時日已莫正值江月黑
顧視天水并坐恐星斗濕使君何時罷登覽不可失

初至金陵

山川過雨曉光浮初看江南第一州路繞匡廬更
去懸知是處可忘憂

樂城集卷之九終

樂城集卷之十

詩九十六首

和孔武仲金陵九詠

白鷺亭

白鷺洲前水奔騰亂馬牛亭高疑欲動船去似無憂
洶湧山方壞澄清練不收中秋誰在此明月滿城頭

覽輝亭

城裏最高處坡陀見一城山多來有緒江遠靜無聲

歌吹風前度樓臺雨後明風光同楚蜀聊此慰平生
鳳凰臺

鳳鳥久不至斯臺空復高何年種梧竹特地翦蓬蒿
白水來無際青山轉幾遭南遊且未返江海共滔滔

天慶觀

興廢不可必治城今靜祠松聲聞道路竹色淨軒墀

江近風雲改亭深草木滋孤墳吊遺直狂閭閻元規

卞壺墓
在觀側

高齋

金陵佳處自無窮使宅幽深即故宮樓殿六朝遺燼

後江山百里舊城中雨餘尚有金鈿落月出長窺粉
堞空看盡一城懷古地茲遊恨不與君同

此君亭

在華藏寺

綠竹不可數孤亭一倍幽色分巖石潤稍出澗松脩
靈節寒方見春萌旱不抽故山多此物長恨未歸休

見江亭

在蔣山

江水信浩渺連山巧蔽虧端能上嶮絕故自識津涯
滅沒檣竿度飄搖鷺羽遲何人倚舟望亦愛此峯危

定林院

定林兩山間崖木生欲合茅屋倚巖隈重重陰清樾

晨齋取旁寺生事信幽絕吾人定何爲常欲依暖熱
八功德水

君言山上泉定有何功德熱盡自清涼苦除卽其滑
頗遭遊人病時取破匏挹煩惱雖云消凜然終在臆

遊鍾山

江南四月如三伏北望鍾山萬松碧杖藜試上寶公
龕衆壑秋聲起相襲青峯回抱石城小白練前橫大
江直石梯南下俯城闔松徑東蟠轉山谷喬林無風
聲如雨時見遊僧石上息行窮碧澗一庵巖坐弄清
泉八功德歸尋晚飯衆山底困卧定林依石壁朝遊

不知澗谷遠莫歸但覺穿雙屐老僧一身泉上住十
年掃盡人間迹客到惟燒栢子香晨飢坐待山前粥
丈夫濟時誠妄語白首居山本良策茹蔬飯糗何足
道純灰洗心聊自滌失身處世足愆尤愧爾山僧少
憂責

郭祥正國博醉吟庵

姑熟溪頭醉吟客歸作茅庵劣容席團團鵠卵中自
明窓前月出夜更清醉吟自作溪上語不學擁鼻雒
陽生詩成付與坐中讀知有清溪可終日作詩飲酒
聊復同誰來共枕溪中石圓天方地千萬里中與此

間大相似鬻然一息不自停水火雷風相滅起直須
只作此庵看歌罷曲肱還醉眠不用騎鯨學李白東
入滄海觀桑田

湖陰曲

老虎穴中臥獵夫不敢窺驊騮服箱驂盜驪巡城三
匝漫不知帳中晝夢日繞壁驚起知是黃須兒馬鞭
七寶留道左猛士徘徊不能過遺矢如水去已遙明
日神兵下赤霄荒城至今人不住狐兔驚走風蕭蕭
舟次大雲倉回寄孔武仲

一風失前期十日不相見君帆一何駛去若乘風箭

我舟一何遲出沒蔽葭亂甕中有白糟床上有黃卷
妻孥不足共思子但長嘆池陽重相遇撫手成一粲
先行復草草回首空眷眷人生類如此遲速亦何算
一見誠偶然四海良獨遠相期廬山陰把臂上雲巘
池州蕭丞相樓二首

遶郭青峯睥睨屯入城流水縠文翻樓成始覺江山
勝人去方知德業尊坐久浮雲霾後嶺酒醒飛雪變
前村我來邂逅公歸國猶喜登臨共一樽

池守滕元發
時將解去

丞相風流直至今朱欄仍對舊山林奔馳軒冕終何
有跌宕圖書意最深松繞城頭風瑟縮江浮山外氣

陰森三年不起南遷想應有前人識此心

過九華山

南遷私自喜看盡江南山孤舟少僮僕此志還復難
局促守破窓聯翩過重巒忽驚九華峰高拱立我前
蕭然九仙人縹緲陵雲烟碧霞爲裳衣首冠青琅玕
揮手謝世人可望不可攀我行竟草草安能拍其肩
但聞有高士臥聽松風眠松根得茯苓狀若干歲竈
煮食一朝盡終身棄腥羶腹背生綠毛輕舉如翔鸞
相逢欲借問已在長松端何年脫罪罟出處良自便
芒鞋拄藤杖逢山卽盤桓斯人未可求巖室儻復存

佛池口遇風雨

長江五月多風暴欲行先看風日好此風忽作東南
來陰雲如湧撥不開驚雷往還轉車轂狂波低昂起
坑谷中流一葉那復持卷舒已副天公知解帆轉舵
不容語佛池口中幸可住須臾急雨變昏霾舵師喜
賀風已回澄溪不動縈白練老木蒼崖蔚葱蒨
茅屋得青蔬試問釣船還有魚開樽引滿向妻子明
日復行未須怖陰陽開闔良等閑扁舟誰令乘嶮艱
舟次磁湖以風浪留二日不得進子瞻以詩見
寄作二篇答之前篇自賦後篇次韻

慙愧江淮南北風扁舟千里得相從黃州不到六十
里白浪俄生百萬重自笑一生渾類此可憐萬事不
由儂夜深魂夢先飛去風雨對床聞曉鐘

西歸猶未有菟裘擬就南遷買一丘舟楫自能通蜀
道林泉真欲老黃州魚多釣戶應容貰酒熟鄰翁便
可留從此莫言身外事功名畢竟不如休

黃州陪子瞻遊武昌西山

千里到齊安三夜語不足勸我勿重陳起遊西山麓
西山隔江水輕舟亂見鶯連峯多回溪盛夏富草木
杖策看萬松流汗升九曲蒼茫大江湧浩蕩衆山蹙

上方寄雲端中寺倚巖腹清泉類牛乳煩熱須一掬
縣令知客來行庖映脩竹黃鵝時新煮白酒亦近熟
山行得一飽看盡千山綠幽懷苦不遂滯念每煩促
歸舟浪花暝落日金盤浴妻孥寄九江此會難再卜
君看孫討虜百戰不搖目猶憐江上臺高會飲千斛
巾冠墮臺下坐使張公哭異時君再來携被山中宿

將還江州子瞻相送至劉郎家泐王生家飲別

相從恨不多送我三十里車湖風雨交晉車武子故居其水曰車

湖松竹相披靡繫舟枯木根會面兩王子嘉眉雖異

郡鷄犬固猶爾相逢勿空過一醉不須起風濤未可

涉隔竹見奔駛渡江買羔豚收網得魴鯉朝畦甘瓠
 熟冬盎香醪美烏菱不論價白藕如泥耳誰言百口
 活仰給一湖水奪官正無賴生事應且爾卜居請連
 屋扣戶容屣履人生定何為食足真已矣愆尤未見
 雪世俗多相鄙買田信良計蔬食期沒齒手持一竿
 竹分子長湖尾

赤壁懷古

新破荊州得水軍鼓行夏口氣如雲千艘已共長江
 嶮百勝安知赤壁焚觜距方強要一關君臣已定勢
 三分古來伐國須觀釁意突成功所未聞

自黃州還江州

身浮一葉返湓城凌犯風濤日夜行把酒獨斟從睡
 重還家漸近覺身輕岸回樊口依稀見日出廬山紫
 翠橫家在庾公樓下泊舟人遙指岸如頰

江州城下土赤如赭

江州五詠

射蛟浦

萬騎巡遊遍千帆破浪輕射蛟江水赤教戰越人驚
 山轉樓船影岸摧連弩聲祈招無為賦酣寢盡平生

浦上積水相傳漢武教樓船於此

浪井

江波浮陣雲岸壁立青鐵胡爲井中泉湧浪時驚發
水性本無定得止自澄澈誰爲女媧手補此天地裂

庾樓

元規情不薄上客有殷生夜半酒將罷公來坐不驚
舞翻江月迥談落塵毛輕塵世風流盡高樓空此名

東湖

讀書廬山中作郡廬山下平湖浸山脚雲峯對虛榭
紅蕖紛欲落白鳥時來下猶思隱居勝亂石驚湍瀉

李勃隱居廬山泉石奇勝今棲賢寺其故居也及爲九江太守始營東湖風物可愛

琵琶亭

湓江暮雨晴孤舟暝將發夜聞胡琴語展轉不成別
草堂寄東林雅意存北闕潛然涕泗下安用無生說

不到東西二林

山北東西寺高人永遠師來遊亦前定回首獨移時
社散白蓮盡山空玄鶴悲何年陶靖節溪上送行遲
遊廬山山陽七詠

開先瀑布

山上流泉自作溪行逢石缺瀉虹霓定知雲外波瀾
濶飛到峯前本末齊入海明河驚照曜倚天長劍失
提携誰來卧枕莓苔石一洗塵心萬斛泥

漱玉亭

山回不見落銀潢餘溜喧
應響石塘目亂珠璣濺空
谷足寒雷電繞飛梁入瓶
銅鼎春茶白接竹齋厨午
飯香從此出山都不棄滿
田秔稻插新秧

簡寂觀

山行但覺鳥聲殊漸近神
仙簡寂居門外長溪淨客
足山腰苦笋助盤蔬喬松
定有藏丹處大石仍存拜
斗餘弟子蒼髯年八十養
生世世授遺書

歸宗寺

來聽歸宗早晚鐘疲勞懶
上紫霄峯墨池湯壘溪中

石白塔微分嶺上松佛宇爭推一山甲僧厨坐待十

方供欲遊山北東西寺巖谷相連更幾重此寺王逸少所置云

有墨池在焉

萬杉寺

萬木青杉一手栽滿堂白佛九天來仁宗初年有僧手種萬杉特為

建此寺仍以禁中佛賜之涓涓石溜供厨足轟轟山屏遶寺開半

榻松陰秋簟冷一杯香飯午鐘催安眠飽食平生事

不待山僧喚始迴

三峽石橋

三峽波濤飽沂沿過橋雷電記當年江聲髣髴瞿唐

口石角參差灑瀕前應有夜猿啼古木已將秋葉作
歸船老僧未省遊巴蜀松下相逢問信然

白鶴觀

五老相携欲上天玄猿白鶴盡疑仙浮雲有意藏山
頂流水無聲入稻田古木微風時起籟諸峯落日盡
生烟歸鞍草草還城市慙愧幽人正醉眠

南康阻風遊東寺

欲涉彭蠡湖南風未相許扁舟厭搖蕩古寺慰行旅
重湖面南軒驚浪卷前浦霏微雪陣散顛倒玉山舞
一風輒九日未悉土囊怒百里斷行舟仰看飛鴻度

故人念征役一飯語平素竹色淨飛濤松聲亂秋雨
我生足憂患十載不安處南北已兼忘遲速何須數

寄題陳憲郎中竹軒

家有脩篁綠滿軒趨庭詩禮舊忘言凌霜自得良朋
友過雨時添好子孫試剪輕筠扶野步旋收涼葉煮
清樽風流共道勝桑梓鄰里何妨種百根

次韻孔武仲到官後見寄

舉楫同千里繫舟時一言共嗟蓬作屋願就席爲門
行役身先困征商思益昏僅同登壘斷何止服車轅
次韻筠守毛維瞻司封觀脩城三首

北垣荆棘舊成堆，留待公來次第開。
車馬已通城下路，榛蕪盡付冶家灰。
異時碧瓦千門合，應記紅旌百
度來自笑禪。 謀便曠野肩輿飛，蓋許追陪
撥棄案頭文字堆。 曉晴山色四門開，究懷民事老雖
壯，俛首山城心已灰。 荆棘燒殘桑柘出，狐狸去盡犬
鷄來。 規模先遣通蹊隧，後乘應容衆客陪。
山脚侵城起阜堆，遶城微道斬新開。 闔閭半壞驚潮
信，隍壑初深見劫灰。 蟻聚千夫曾幾日，鱗差萬瓦看
將來。 史君才力輕山郡，朝論行聞急召陪。

次子瞻夜字韻作中秋對月二篇一以贈王郎

二以寄子瞻

平明坐曹黃昏歸，終歲得閑惟有夜。 已邀明月出墻
東，更遣清風掃庭下。 城上青鬟四山合，門前白練長
江瀉。 誰家高會吹參差，鄰婦悲歌春罷亞。 二年憂患
今已過，一夜清光天所借。 西京詩句出蘓李，南國風流
數王謝。 已隨孤棹去中原，肯顧新科求上舍。 讀書本
自比嵇鍛學劍，要須問曹蔗清觴灑灑。 君莫違佳句，
駸駸予已怕。 狂夫猖狂終累人，不返行遭親黨罵。
十年秋月照相思，相從祇有彭門夜。 露侵笳鼓思城
闕，寒迫魚龍舞潭下。 厭厭夜飲歡自足，落落襟懷向

人瀉秋深河來巨野溢水乾樓起滕王亞北海孔公
雖好客河內寇尹那得借是非朝野忽紛紜得喪芳
菲一開謝明月多情還入門流水何知空繞舍晨餐
江市富鱸魴夜宿山村足梨蔗坐隅鵬鳥不須問墻
外蝮蛇猶足怕婁公見唾行自乾馮老尚多誰定罵
次韻王適食茅栗
相從萬里試南餐對案長思苜蓿盤山栗滿籃兼白
黑村醪入口半甜酸久聞牛尾何曾試竊比雞頭意
未安故國霜蓬如益大夜來彈劍似馮驩

過毛國鎮夜飲

風格照人華省郎江山遶郭古仙鄉漫傳鉛鼎八百
歲未比金釵十二行不動歌聲人已醉旋聞詩句夜
初長簿書撥盡知餘力道院清虛頃未嘗

次韻毛國鎮趙景仁唱和三首一贈毛一贈趙

一自詠

治劇從容緩策銜鈴軒無事日清談隼旗畫戟明千
里紙帳繩床自一菴金奏屢陳容客和玉山不動看
賓酣我來邂逅逢寬政忘却漂流身在南

一紙新詩過雁銜醒然何異接君談奉親魚蟹兼臨
海退食葉書定有菴一別經年真似夢多憂不飲亦

如酣共君友契非今日蔽芾棠陰自劍南
 遠謫江湖舳尾銜到來辛苦向誰談畏人野鶴長依
 嶺厭事山僧祇住菴黃雀頓來成一飽白醪新熟喜
 初酣踈頑近日尤堪笑坐任飄風去自南

再和三首

穴鼠何須窺數銜麤官不用苦高談夜傾綠蟻風吹
 竹晝擁黃紬雪覆菴每作微詞還自笑偶漸餘潤亦
 成酣公詩精絕非倫擬自古騷人盡在南

燕窠泥土一春銜慙愧封侯止立談舊隱尚聞存竹
 徑歸休但要葺茅菴釣船夢想沿溪泛酒盞遙思向

日酣強欲遲留依幕府吳公行恐召河南
 天教窮困欲誰銜生事那須一一談自笑豐年塵滿
 甌不堪雨後菌生菴士師憔悴經三黜陶令幽憂付
 一酣他日歸耕苦相憶尺書頻寄北山南

次韻王適州學新修水閣

黃鍾巨挺兩春容何幸幽居近學宮坐對江山增浩
 氣力追齊魯欲同風頌詩聞道求何武家法行看試
 左雄欲伴少年遊矍相奔軍慚愧恐詞窮

次韻毛君九日

山脚侵城盡是臺登高處處喜崔嵬手拈霜菊香無

柰向拂江風酒自開幕府尊壘雲裏集民家歌吹靜
中來定知勝却陶彭澤悵望籬邊白日頽

次韻毛君感事書懷

種棠經歲便成科秋雨調勻氣漸和才力有餘嫌事
少風情無限覺詩多長松更老仍添節古井雖深自
不波宴坐山房人豈識一尊聊且慰蹉跎

次韻毛君見督和詩

新詩落紙一城傳顧我踈蕪豈足編他日杜陵詩集
裡韋迢畧見兩三篇

次韻毛君山房遣興

欲就陽崖暖新開石磴斜誰言太守宅自是野人家
燕坐收心鑑冥觀閱界沙退公長寂寞外物自喧譁
缺逕移松補斜陽種竹遮白雲生後礎孤鶩伴殘霞
破悶時尋鶴呼眠亦任鴉喜聞槽出甕屢問菊開花
古井元依斗丹砂舊養芽虬蟬頻上案猿狖巧分樵
客到扁舟遠年侵兩鬢華心搖挂風旆眼暗隔輕紗
強撥橫肱睡來從插版衙隱居慙棄擲勝地每咨嗟
頑鈍終何取彫磨豈復加焦先夙所尚園舍恰如蝸
和胡教授蒙太守策試諸生
著籍初同闕里多采芹先致魯風和欲將大策觀胸

膽盡召中堂列雁鵝終日正言何忌諱幾人餘力尚
委蛇豈惟太守知為政仍見先生善設科

和毛君州宅八詠

鳳凰山

山川蟠踞偶成形威鳳低回久未行更種梧桐真可
致高飛性似伯夷清

披仙亭

仙翁舊住蜀江邊千歲歸來一鶴翩城郭已非人事
改淒涼遺迹但披仙

方沼亭

池上茅簷覆水低早來秋雨尚虹霓敗荷折葦飛鴻
下正憶漁舟泊故溪

翠樾亭

一夜飛霜點綠苔曉庭黃葉掃成堆簷間翠樾彫踈
盡却放墻東好月來

李八百洞

洞府山川百里賒洞門藤蔓鎖烟霞神仙不與人間
異弟妹還應共一家

煉丹井

鑿井燒丹八百年塵緣消盡果初圓石床薜蘿人安

在綠水團團一片天

磨劍池

神仙鑄劍本無刃岸古班班尚鐵銚天上少年仍狡
獠不須還爾對方平

山房

岸憤携筇夜夜來蒲團紙帳竹香臺直須覓取僧為
伴更為開菴斲草萊

次韻毛君病中菊未開

病肺秋深霧雨傷舊繒故絮喜清涼菊花金粟未曾
吐桂酒鵝兒空自黃草木亦知年有閏風霜漸近月

方陽十月為陽月得詩聞道維摩病欲到毘耶言已忘

雨中宿酒務

微官終日守糟缸風雨淒涼夜渡江早歲謬知儒術
貴安眠近喜壯心降夜深唧唧啾鳴甕睡起蕭蕭葉
打窓阮籍作官都為酒不須分別恨南邦

次韻毛君經旬不用鞭朴

共喜秋深酒味醇官曹休假不須旬政寬境內棠陰
合訟去庭中草色新不惜牛刀時一割已因鼯鼠發
千鈞歲終誰為公書考豈止江西第一人

次韻李撫辰屯田修州門

六月江濤壁壘頽蒼崖翠甍就新臺咄嗟雙闕還依
舊咫尺羣山信有材畫戟風生兩衙退飛橋日出萬
人來不因毀圯催興築誰見雍容治劇才

飲酒過量肺疾復作

朝蒙麴塵居夜傍糟床卧鼻香黍麥熟眼亂瓶罌過
囊中衣已空口角涎虛墮啜嘗未云足盜醕恐深坐
使君信寬仁高會慰寒餓西樓適新成明月猶半破
擁簷青山橫拂檻流水播雕繁貯霜實銀盞薦秋糯
共言文字歡豈待紅裙佐惟知醜醜滑不悟頗羅大
夜歸肺增漲晨起脾失磨情懷忽牢落藥餌費調和

衰年足奇窮一醉仍坎坷清尊自不惡多病欲何奈
聞公話少年舉白不論箇歌吟雜嘲謔笑語爭掀簸
平明起相視銳氣曾未挫達人遺形骸駑馬懷豆莖
不知逃世網但解憂歲課不見獨醒人終費招魂些
衢州趙閱道少師濯纓亭

挂冠纓上已無塵猶愛溪光碧照人點檢舊遊黃石
在掃除諸念白鷗親一尊父老囊金盡三逕松筠生
事貧他日南公數人物丹青添入縣圖新

茶花二首

黃蘗春芽大麥蘗傾山倒谷採無餘久疑殘枿陽和

畫尚有幽花霰雪初耿耿清香崖菊淡依依秀色嶺
梅如經冬結子猶堪種一畝荒園試爲鉏

細嚼花鬚味亦長新芽一粟葉間藏稍經臘雪侵肌
瘦旋得春雷發地狂開落空山誰比數烝烹來歲最
先嘗皮枯葉硬天真在踏遍牛羊未改香

次韻毛君山房卽事十首

案牘

意自開夜闌幽夢曉方回青苔紅葉騷人

事時見詩筒去又來

東晉仙人借舊山定應天意許公閒郡人欲問史君
處笑指峯巒紫翠間

蛩知秋候時鳴壁香礙蒲簾不出門隱几無言心有
得南窓晴日暖侵軒

溪山付與醉中仙美酒何曾斗十千就得江邊賤魚
稻閑官未用苦相憐

忘身先要解忘名分別須臾起不平請看早朝霜入
履何如卧聽打衙聲

禽哢秋來不復圓桐陰霜後亦成穿黃花強欲招酣
飲白髮偏工報老年

邂逅清歡屢不期病來無奈羽觴飛醉乘籃輦江邊
去長伴漁舟月下歸

醉裡題詩偏韻惡秋來勸酒益杯深不才多病俱非
敵綠綺緣何得報金

庵中獨宿雨垂垂永夜無人欵竹扉灰冷銅爐香欲
滅床頭一點葛燈微

觸事隨緣不用多華堂玉食奈憂何美人未厭山阿
陋薜荔爲裳帶女蘿

再和十首

澗草巖花日日開江南秋盡似春回旋開還落無人
顧惟有山峰暖尚來

江上孤城面面山居人也自不曾閑蜂遊蟻聚知何

事日夜長橋南北間

城郭村墟共水雲
籬竹屋映柴門隱居亦有高人
在岸幘無言倚釣軒

一官踈散自疑仙三考應成醉日千早病固須閑地
著多憂長被達人憐

養生尤復要功圓溜滴南溪石自穿近見牢山陳道

士微言約我更三年

牢山陳道士瑛近過此叩之
竟無所云約三年當再見

張公詩社見公名

公昔與張伯達
爲唱和之友

白首山城嘆不平

坐客要聞新樂府應須湓口琵琶聲

高情日與故山期鴻鵠誰言也倦飛且聽漁人強嘯

癭坐中羈客畏公歸

天為多才故欲禁府門摧落漲江深鼎新翠壁排精

鐵湧出飛樓直百金

樓上青山遶四垂畫橋百步引朱扉落成當與公同

上一看長江白練微

歌舞留賓意自多華燈數問夜如何白頭病客無才

思憤卧茅簷長薜蘿

筠州二詠

牛尾狸

首如狸尾如牛攀條捷嶮如狻猴橘柚為漿栗為餽

筋肉不足惟膏油深居簡出善自謀尋踪發窟并執
囚蓄租分散身為羞松薪瓦甑烝浮浮壓入糟盎肥
欲流熊肪羊酪真比儔引筋將舉訊何尤無功竊食
人所仇

黃雀

秋風下黃雀飛禾田熟黃雀肥羣飛蔽空日色薄遂
巡百頃禾為稀翻翻巧捷多且微精丸妙繳舉輒違
乘時席勢不可揮一朝風雨寒霏霏肉多翅重天時
非農夫舉網驚合圍懸頸系足膚無衣百箇同走仍
相依頭顱萬里行不歸北方居人厭羔豨咀噍聊發

風霜曾不到盆花蜂蝶未全諳
 公餘野鵲驚初睡
 賓醉佳人笑劇談
 勸客巨觥那得避
 和詩難韻不容探
 曉來霏霧連江氣
 冬後溫風帶嶺嵐
 去國屢成還蜀
 夢忘憂惟有對公酣
 終身狗祿知何益
 投檄歸耕貧
 未堪借我此庵泥
 藥竈古書鴻寶試淮南

寒雨

江南殊氣候冬雨作春寒
 冰雪期方遠蕉絺意始闌
 未妨溪草綠先恐嶺梅殘
 忽發中原念貂裘據錦鞍

積雨二首

山雨無時歇江波上岸流
 泥深未免出橋斷更堪憂

房淺鄰糟甕宵寒攬絮裘
 朝來勢未已歸路恐操舟

其二

微陽力尚淺未解破重陰
 雲氣山川滿江流日夜深
 凍芽生滯穗餘潤及重衾
 泥滓沉車轂農輸絕苦心

戲贈李朝散

江霧霏霏作雪天樽前醉倒不知寒
 後堂桃李春猶晚
 試覓花子細看

戲答

銀瓶瀉酒正霜天玉塵生風夜更寒
 下客不辭投轄飲
 好花猶恐隔簾看

臨江蕭氏家寶堂

高人不解作生涯唯有中堂書五車竹簡多於孔氏
壁牙籤新似鄴侯家田園豈是子孫計青紫今爲里
巷誇富貴早知皆有命君應未厭十年賒

和蕭利察推賀族叔司理登科還鄉四首

家聲籍籍大江西臨老揮毫捧御題得意何殊少年
樂還家不惜醉如泥

讀盡家藏萬卷書蕭然華髮宦遊初區區獄掾何須

愧聊把春秋試緒餘

漢儒以春秋決獄

作官未減讀書勤簿領從今日日新汗簡韋編誰付

予傳家應有下帷人

巷南諸子足才賢邂逅相逢秀句傳強作短章同寄
與異時見我一依然

次韻吳厚秀才見贈三首

騷人思苦骨巖巖百里携詩相就談故作微詞挑遷
客不嫌春雨濕歸衫少年舊喜登高賦老病今成見
敵慙問我近來誰復可對君聊擬誦周南

久欲歸田計未成羨君負郭足爲生躬耕不用千鍾
祿高卧誰知萬里征已覺安閑真樂事可憐辛苦盡
浮名隱居便作江南計爲覓佳山早寄聲

一卷新詩錦一端掉頭吟諷識芳酸哀歌永夜悲牛
角朗詠扁舟笑杏壇間發笙簧猶可擬棄捐斤斧定
知難繼君高韻君應笑咀嚼歸途久據鞍

次韻毛君燒松花六絕

茅庵紙帳學僧眠爐爇松花取易然唯有未能忘酒
在手傾金盞關垂蓮

麤雜松黃二月天盤敲松子早霜寒山家一物都無

棄狼藉乾花最後般蜀人以松黃為餅甚美

松老香多氣自嚴餘烟勃鬱透疎簾須臾過盡惟灰
在借問誰收一番去聲炎

美人寒甚懶開扉金作松花插幕羅幾度低頭疑墮
落青烟已斷未消時

枯萼鱗皴不復堅重重正似半開蓮曾經樵舍埽爐
見未許邦君畫閣然

黃蠟供炊自一家錙銖貧富遞矜誇都城爭買方薪
貴却顧松花已自奢

陪毛君遊黃仙觀

李叟仙居仍近市黃公道院亦依城定應昔日山林
地未有今時鷄犬聲白鶴翻飛終不返黃冠憔悴只
躬耕試從車騎尋遺跡恐有居人解養生

次韻王適梅花

江梅似欲競新年
照水窺林態愈妍
霜重清香渾欲
滴月明素質自生烟
未成細實酸猶薄
半落南枝意
可憐誰寫江西風
物樣徐家舊有數枝傳

次韻王適春雪二首

江南春候寒猶劇
細雨風吹作雪花
中夜窓扉初晃
漾平明草木半低斜
潤催江柳排金綠
光雜山茶點
絳葩老病不
忍乘曉出紛紛
能使髮增華
春雪飄搖旋不成
依稀履跡散空庭
山藏複閣猶殘
白日照南峯已半青

毛君惠濕柑荔支二絕

楚山黃橘彈丸小
未識洞庭三寸柑
不有風流吳越
客誰令千里送江南
荔子生紅無奈遠
陳家曬白到猶難
雖無驛騎紅塵
起尚得佳人一咲歡

次韻王適遊真如寺

江上春雨過城中
春草深擾擾市井塵
悠悠溪谷心
東郊大愚山自古
簷蔔林微言久不聞
墜緒誰當尋
道俗數百人請聞
海潮音齋罷車馬散
萬籟俱消沉
新亭面南山積霧開
重陰蕭然偶有得
懷抱方悄悄

我坐米鹽間日被塵垢侵不知山中趣強作山中吟
次韻王適新燕

好雨纖纖潤客衣新來雙燕力猶微似嫌春早無人
見故待簾開掠地飛南國花期知不遠中原寒劇未
應歸養雛不怕巢成早記取朝朝為啓扉

官居即事

官局紛紜簿領迷生緣瑣細老農齊偷安旋種十年
木肉食還須五母鷄對酒不嘗憐酷推釣魚無術湯
臨溪此身已分長貧賤執爨縫裳愧老妻

陪毛君夜游北園

池塘草生春尚淺桃李飛花初片片一尊花下夜忘
歸燈火尋春畏春晚春風暗度人不知滿園紅白已
離披江南春雨少晴日露坐青天能幾時折花只恐
傷花意携客就花花定喜落盡飄香翠袖中交柯接
葉燈光裡雨練風柔雪不如精神炫轉影扶踈夜看
飛燕勝朝日月暗還須明月珠美人勸我殊非惡明
日雨來無此樂醉歸不用怕山公馬上接羅先倒著

山橙花口號

故鄉寒食茶糜發百和香濃村巷深漂泊江南春欲
盡山橙髮鬢慰人心

次韻馮弋同年

細雨濛濛江霧昏坐曹聊且免泥奔賣鹽酷酒知同
病一笑何勞賦北門

送王適徐州赴舉

送別江南春雨淫北方誰是子知音性如白玉燒猶
冷文似朱弦叩愈深萬里同舟寬老病一杯分袂發
悲吟明年榜上看名姓楊柳春風正似今

遊吳氏園

細雨作寒晴便暖好風吹袂意初佳清池解洗春心
熱紅艷能添醉眼花紫竹暗生岷岫笋山舟強比洛

人家憐渠巧與閑官便申退來遊未覺賒

江州周寺丞泳夷亭

行過廬山不得上湓江城邊一惆悵羨君山下有夷
亭千巖萬壑長相向山中李生好讀書出山作郡山
前居手開平湖浸山脚未肯卽與廬山踈道州一去
應嫌遠千里思山夢中見青山長見君嫌要須罷
郡歸來看

次韻毛君遊陳氏園

增築園亭草木新損花風雨恣頻頻簞管似欲迎初
暑芍藥猶堪送晚春薄暮出城仍有伴携壺藉草更

無巡歸軒有喜知誰見道上從橫滿醉人

江漲

山中三日雨江水一丈高崩騰沒州渚淫溢侵蓬蒿
凌晨我有適出門舟自操中塵已易肆下道先容初
鷄犬萃墳冢牛羊逾圈牢厨薪散流枿困米爲浮糟
卧席不遑卷剥蠶仍未縲老弱但坐視閭里將安逃
徙居共擾擾來勢方滔滔嗟余偶同病哀爾爲生勞
晴日慰人願寒風送驚濤藩籬出舊趾羸蚌遺平臯
流竄非擇地艱難理宜遭胡爲苦戚戚一夕生二毛

和子瞻鐵拄杖

截竹爲杖瘦且輕石堅竹破誤汝行削木爲杖輕且
好道遠木折恐不到閩君鐵杖七尺長色如黑虵氣
如霜提携但恐汝無力撞堅過嶮安能傷柳公雖老
尚強健閉門却掃不復將知公足力無嶮阻憐公未
有登山侶回生四海惟一身袖中長劍爲兩人洞庭
漫天不覺過半酣起舞驚鬼神願公此杖亦如此適
意遨遊日千里歸來倚壁示時人海外蒼茫空自記

競渡

史君欲聽榜人謳一夜江波拍岸流父老不知招屈
恨少年爭作弄潮遊長鯨破浪聊堪比小旆逆風殊

未收角勝爭先非老事凭闌寓目思悠悠

登郡譙偶見姜應明司馬醉歸

蒼然莫色映樓臺江市遊人夜未迴何處酒仙無一事肩輿鼾睡過橋來

送姜司馬

七歲立談明主前江湖晚節弄漁船鬪鷄誰識城東老喪馬方知塞上賢生計未成歸去詠草書時發醉中顛當年不解看齊物氣踴如山誰見憐

寄題趙岵承事戲綵堂

春晚安輿遍浙東永嘉別乘喜無窮橐裝已笑分諸

子吏道何勞問薛公堂上壽樽諸掾集室中禪論衲僧通興闕却返林泉去幕府長留孝弟風

次韻温守李鈞亮寄兼簡毛大夫

梁苑相從簿領中清風相逐畫船東婆娑江海凌雲鶴飲啄籠樊失渚鴻別後丹砂迷舊訣愁來白髮變衰翁此間詩老仍勅敵正憶高吟酒盞空

次韻洞山克文長老

無地容錐卓年來轉覺貧偶知珠在手一任甌生塵竄逐非關性顛狂却甚真此心誰復識試語洞山人試院唱酬十一首

戲呈試官呂防

新秋風月正涼天空館相看學坐禪滿榻詩書愁病
眼隔牆砧杵思高眠霜飛一葉凋瓊玉風遶雙松奏
管絃聞道熊羆歸夢數侵天闌棘漫森然

次韻呂君豐城寶氣亭

紫氣飛空不自謀誰憐龜勉匣中留西山猛獸橫行
甚北海長鯨何日收星斗不堪供醉舞蛟龍會看反
重湫功成變化無踪跡望斷中原百尺樓

次韻呂君見贈

偶然傾蓋接清言不覺門前晝漏傳老病低摧方伏

櫪壯心堅銳正當年莫嫌客舍一杯酒試論瀟山三

祖禪明日程文堆几案只應衰懶得安眠

呂前官舒州問禪瀟山

次韻呂君興善寺靜軒

自恨尋山計苦遲年過四十始知非小軒迎客如招
隱野鳥窺人自識機窓外竹深孤鶴下堦前菊秀晚
蜂飛老僧戰勝長幽寂瘦骨緣何未肯肥

觀試進士呈試官

松庭散朝日棘戶啟秋風鵠鷺紛來下旌旗儼未攻
馳詞看倚馬餘力送征鴻逸足誰先到孤標想暗空
晶筭雙鏡並高下片言公老病方耽睡飛沉一夢中

次前韻

南國號多士幾人洙泗風英材自入彀壞陣不勞攻
文縵山藏豹飛高弋慕鴻蚩妍歸品藻得失付虛空
考行先推本登賢旋奏公期君緩歸轡一醉鹿鳴中

戲呈試官

只隔墻東便是家悄悄還似在天涯客心不耐聽松
雨歸信猶堪飲菊花剪燭看書良寂寞披沙見玉忽
喧譁自慙空館難留客試問姮娥稍駐車

次前韻二首

老去在家同出家楞伽四卷即生涯
龕詩怪我心猶

壯細字憐君眼未花霜落初驚衾篔簹冷酒酣猶喜笑

言譁歸心知有三秋恨莫學匆匆下坂車

門前溪水似漁家流浪江湖歸未涯邂逅高人來說

法支離枯木旋開花諸生試罷書如積劇縣歸時訟

正譁安得騎鯨從李白試看牛女轉雲車

濁醪能使客忘家屈指歸期已有涯魚化昨宵驚細

雨鹿鳴他日飲寒花已諳江上肴蔬薄莫笑衙前鼓

笛譁太守况兼鄉曲舊會須投轄止行車

試罷後偶作

重門閉不開烏鳥相呼樂晨暉轉簾影微風響松末

喧譁適已定寂歷方有覺人生竟何事外物巧相縛
當時不自悟已過空成作耕耘亦何苦遊宦殊自惡
棄彼既已誤就此良應錯誰能即兩忘隨緣更無作

放榜後次韻毛守見招

飽食安眠愧不材踈簾翠帟幸相陪深居正厭銀袍
亂失喜初聞鐵鎖開佳句徑蒙探古錦小槽仍報滴
新醅諸人欲見風流伯不用招呼亦自來

送毛滂齋郎

先志承顏善養親束裝騎馬試為臣酒腸天予渾無
敵詩律家傳便出人擁鼻高吟方自得折腰奔走漸

勞神歸來一笑須勤取花發陳吳二月春

燕貢士

泮水生芹藻千旄在浚城桑鴉同變響華鹿共和鳴
秋晚槐先墮霜多桂向榮清尊助勸駕急管發驩聲
勇銳青衿士淹通白髮生芬芳雜蘭菊變化等鷗鯨
去日衣冠盛歸時里巷驚坐中詞賦客愧爾一經明
次韻毛君清居探菊

眼前黃葉畏秋霜耳畔啼蛩怨夜長佳節欣聞近
菊清商試為奏伊涼踈狂久笑謀生拙貧病應憐為
口忙今日共君拚一醉從教人道亦高陽

次韻毛君見贈

江國騷人不耐秋夜吟清句曉相投鋒藏豈願囊中
脫尾斷終非俎上羞擇地何年真得意鋪糟是處可
同遊南遷尚有公知我人事何須更預謀

次韻毛君偶成

年來衰病正相兼薄宦奔馳尚未厭詩句空多渾漫
與俗緣已重不須添聱牙向物知難合踈懶憐公獨
未嫌時聽淵明詠歸去猶應爲我故遲淹

孔平仲著作江州官舍小庵

近山不作看山計引水新成照水庵閉口忘言中自

飽安心度日更誰參簡編圍遶穿書蠹窓戶低回作
蠶我亦一軒容膝住獎裘麤飯有餘甘

送饒州周沃秀才免解

少年工作賦中歲復窮經驥老終知道劍埋新發劓
束裝隣里助答策友朋聽還似臨淄貢隨風起北溟
雪中洞山黃蘗二禪師相訪

江南氣暖冬未回北風吹雪真快哉雪中訪我二大
士試問此雪從何來君不見六月赤日起水雹又不
見臘月幽谷寒花開紛然變化一彈指不妨明鏡無
纖埃

毛國鎮生日二絕

生日元同小趙公里間相接往還通怪公日夜歸心

切欲寄此生丹竈中

世謂叔平大趙叅政闕道小趙叅政趙公善養生故有丹竈之句

聞公歸橐尚空虛近送楞嚴十卷書心地本無生滅

處定逢生日亦如如

次韻毛君將歸

疎傳思歸不待時孟軻出晝苦行遲新詩尚許留章句
故事誰從問典彛金馬尚應堪避世石泉未信可
忘饑不才似我真當去零落衡茅隔雍岐

送楊騰山人

胸中萬卷書不如一囊錢不見楊夫子歲晚走道邊
夜歸空床卧兩手摩涌泉窓前雪花落真火中自然
渙然發微潤飛上崑崙顛霏霏雨甘露稍稍流丹田
閉目內自視色如黃金妍至陽不獨凝當與純陰堅
一窮百不遂此事終無緣君看抱朴子共推古神仙
無錢買丹砂遺恨盈塵編歸去守茅屋道成要有年

次韻子瞻與安節夜坐三首

前山積雪暮崢嶸燕坐微聞落瓦聲共對一尊通夜
語相看萬里故鄉情信歸嶺上寒梅遠恨極江南春
草生明日青銅添白髮且須醉睡倒燈檠

少年高論苦崢嶸老學寒蟬不復聲自斷家山空記
路手披禪冊漸忘情功名久已知前錯婚嫁猶須畢
此生家世讀書難便廢漫留案上鐵燈檠
謫官似我無歸計落第憐渠有屈聲握手天涯同一
笑倚門歲晚不勝情黃崗俯仰成陳迹白首蹉跎畏
後生歸去且安南巷樂莫看歌舞醉長檠

次韻毛君上書求歸未報

白髮憂民帶減圍頻聞慷慨賦將歸近傳道士連三
嚙又悟禪門第一機夜永庵中詩自得日高門外客
來稀此心素定誰能勸祇有丁寧詔莫違

次韻毛君絕句

中池有士閉重關夜發天光走玉環白日對人人不
識幅巾破褐任塵湯

次韻毛君留別

問天乞得不訾身屈指人間今幾人魚縱江潭真窟
宅鶴飛松嶺倍精神清風吹雨停歸騎舊圃留花送
晚春自號白雲知有意便從丹竈拂埃塵

送毛君致仕還鄉

古人避世事豈問家有無但言鴻鵠性不受樊籠拘
公家昔盛時阡陌連三衢倉廩濟寒餓婚嫁營羈孤

千金赴高義脫手曾須臾晚爲二千石得不償所通
撫掌不復言但以文字娛我恨見公遲冉冉垂霜鬚
高吟看落筆劇飲驚倒壺負罪不自知適意忘憂虞
忽聞叩天閣言旋故山廬朋友不及謀親戚亦驚呼
人生各有意何暇問俗徒嗟我好竒節嘆公真丈夫
天高片帆遠目斷清風徂惟應東宮保迎笑相攜扶

贈景福順長老二首

并序

輒幼侍先君聞嘗遊廬山過圓通見訥禪師留連
久之元豐五年以譴居高安景福順公不遠百里
惠然來訪自言昔從訥於圓通逮與先君遊歲月

遷謝今三十六年矣二公皆吾里人訥之化去已
十一年而順公年七十四神完氣定聰明了達對
之悵然懷想疇昔作二篇贈之

屈指江西老多言劍外人身心已無著鄉黨湯相親
竄逐知何取周旋意甚真仍將大雷雨一洗百生塵
其二

念昔先君子南遊四十年相看順老在想見訥師賢
歲歷風輪轉禪心海月圓常情計延促無語對潛然
次韻孔平仲著作見寄四首

昔在京城南成均對茅屋清晨屣屣過不顧車擊轂

時有江南生能使多士服同儕畏鋒銳兄弟更馳逐
文成劇翻水賦罷有餘燭連收頷底髭未耗髀中肉
飛騰困中路鼠勉啄場粟歸來九江上家有十畝竹
一官囊包裹萬卷中自足還如白司馬日聽杜鵑哭
我來萬里外命與江波觸罪重慙故人囊空仰微祿
已爲達士笑尚謂愚者福米鹽日草草奔走常碌碌
尺書慰貧病佳句爛珪玉多難畏人知胡爲強題目
徂年暮桑梓歸念寄鴻鵠但願洗餘愆躬耕江一曲

其二

共居天地間大類一間屋推排出高下何異車轉轂

死生本晝夜禍福固倚伏誰令塵垢昏浪與紛華逐
譬如薪中火外照不自燭扈君探至道勸我減染肉
虛心有遺味實腹不須粟芬敷謝桃杏清勁比松竹
息微知氣定睡少驗神足胡爲嗜一飽坐使百神哭
要知丹砂異不受腥腐觸可憐山林姿自縛斗升祿
君看出世士肯屑世間福寧從市井遊與衆同碌碌
不願束冠裳腰金佩鳴玉斯人今何在未易識凡目
恐在廬山中飛翔逐黃鵠試用物色尋應歌紫芝曲

其三

百病侵形骸漸老同破屋中有一寸空能用輻與轂

忽如丹砂走不受凡火伏前瞻已不遠後躡愈難逐
將炊甑中飯未悟窓下燭聰明後聲形口腹嗜魚肉
塵泥翳泉井荆棘敗禾粟未知按妙指漫欲理絲竹
廬山多名緇過客禮白足達觀等存亡世俗強歌哭
確然金石心不畏蚊蚋觸順恣爲裳衣供施謝榮祿
真人我自有渡海笑徐福衆皆指庸庸自顧非碌碌
愧君詩意厚桃李報瓊玉舉網羅衆禽有獲非一目
喧啾定無用要自取黃鵠君看大方家慎勿留一曲

其四

治生非所長見女驚滿屋作官又迂踈不望載朱轂

因緣望罪罟未許卽潛伏空餘讀書病日與古人逐
老妻憐眼昏入夜屏燈燭上官念貧窶時節饋醪肉
衰年類蒲柳世事劇麻粟數日望歸田寄語先栽竹
文章亦細事勤苦定何足君詩四相攻欲看守陣哭
愧無卽墨巧不解火牛觸自非太學生彫琢事干祿
安心已近道閉口豈非福胡爲調狂詞玉石相落碌
腹中抱丹砂舌下漱白玉作詩雖云好未免亂心目
奕秋教二人不取志鴻鵠摩詰非不言遺韻寄終曲
陰晴不定簡唐觀祕校并教吳二君五首

積雨春連夏新晴忽復陰江痕漲猶在梅氣潤相侵

蕉紵還須脫圖書漸不禁江南舊風俗愁絕北來心
其二

蚕眠初上簇麥熟正磨鎌雲氣重重合江流夜夜添
荐饑人甚困多病我仍兼欲就橋南宿单衣莫雨露
其三

漲江方斷渡小棹信輕生貧賤誰憐汝漂浮空自驚
一官終竊食何計早歸耕忽發騷人恨凄涼久未平
其四

西隣豫章客病骨瘦藥藥清夜眠孤枕終朝飽一簞
雨多愁不出講罷未應餐約我晴相過門前泥欲乾
其五

二子薪中楚相携泮上游藜藿聊度日爰象久忘憂
寂寞君何病驅馳我自羞何時采芹處永日看鳧鷗

樂城集卷之十一

清夢軒

樂城集卷之十二

宋 西蜀蘓轍子由 著

明 東吳王執禮子敬 校

詩八十九首

雨後遊大愚

風光四月尚春餘
淫雨初乾積潦除
古寺蕭條仍負郭
閑官踈散亦肩輿
摘茶戶外添黃葉
掘笋林中間
綠蔬一飽人生真
易足試營茅屋傍
僧居

送高安羅令審禮

一邑憂勞水旱中
牛刀閑暇似無功
政成仍喜新蠶

熟歸去還將舊橐空清白久聞誇父老沉埋誰爲愬
諸公謫居長恨交遊少悵望肩輿又欲東

送唐覲

溪上幽居少四鄰西家幸有著書人經年食菜誰憐
瘦終日題詩自不貧身在江湖釣竿地心馳蘭會戰
車塵此行便有飛騰處笑殺年來老病身

唐君常欲爲陝西官

慨然有功名之志

次韻唐覲送姜應明謁新昌杜簿

夫子雖窮氣浩然輕箠短笠傲江天薄遊到處唯耽
酒歸去無心苦問田泮上講官殊不俗山中老簿亦

疑仙相從未足還辭去欲向曹溪更問禪

姜如晦方作嶺外之行

新種芭蕉

芭蕉移種未多時濯濯芳莖已數圍畢竟空心何所
有欹傾大葉不勝肥蕭騷莫雨鳴山樂狼籍秋霜脫
弊衣堂上幽人觀幻久逢人指示此身非

次韻姜應明黃蘗山中見寄

垂老閑居味更深此身隨世任浮沉北窓未厭曲肱
卧西洛能傳擁鼻吟疋馬徬徨猶寄食弊裘安樂信
無心我今漂泊還相似同愧高僧支道林

次韻黃大臨秀才見寄

故人聚散霜前葉往事眇茫風際烟遊宦一生非有
已隱居萬事不由天崎嶇檻穿方謀食嘯傲山林肯
計年賴已將心問盧老相逢他日笑風顛

次韻李朝散遊洞山二首

古寺依山占幾峰精廬髣髴類天宮三年欲到官爲
礙百里相望意自通無事佛僧何處著入羣鳥獸不
妨同眼前簿領何時脫一笑相看丈室中
僧老經時不出山法堂延客未曾關心開寶月嬋娟
處身寄浮雲出沒間休夏巾緝誰與共迎秋水石不
勝閑近來寄我金剛頌欲指胸中無所還

簡學中諸生

泮水秋生藻荇涼莫窓燈火亂螢光圖書粗足惟須
讀菽粟才供且自強羽籥暗催新節物弦歌不廢近
詩章腐儒最喜南遷後仍見西雛白鷺行

以蜜酒送柳真公

床頭釀酒一年餘氣味全非卓氏壚送與幽人試嘗
看不應知是百花鬚

次韻柳見答

桂酒無人寄豫章江西官釀惟豫章最佳羈愁牢落遣誰當烹

煎崖蜜真牽強慙愧山蜂久蓄藏江上鱸鱸橙正熟

山頭吹帽菊初香
漂流異日俱陳迹
笑說過從想未忘

披仙亭晚飲

落日欲沒多雲烟
南山暝鴉歸北山
樓臺城上半明滅
燈火橋頭初往還
江西八月熱猶在
坐中遷客頭欲班
何時解網聽歸去
黃花白酒踈籬間

余居高安三年每晨入莫出輒過聖壽訪聰長老
謁方子明浴頭笑語移刻而歸歲月既久作
一詩記之

朝來賣酒江南市
日莫歸爲江北人
禪老未嫌參請數
漁舟空怪往來頻
每慙菜飯分齋鉢
時乞香泉洗病身
世味漸消婚嫁了
幅巾緇褐許相親

次韻子瞻感舊見寄

少年耽世味徘徊不能去
老來悟前非尚愧昔遊處
君才最高峙鶴行雞羣中
我雖非君對顧以兄弟同
結髮皆讀書明月入我牖
縱橫萬餘卷臨紙但揮手
學成竟無用掩卷空自疑
却尋故山友重赴幽居期
秋風送餘熱冉冉如人老
衣裘當及時田廬亦須早
種竹竹生笋種稻稻亦成
浩歌歸來曲曲終有遺聲

次韻和人豐歲

風雨迎寒欲勞農今年真不負元豐蓋藏共荷官無
擾眠食安知帝有功草笠黃冠將蜡祀羔羊朋酒亦
幽風請君早具躋堂飲退食委蛇正自公

同孔常父作張夫人詩

女子勿言弱男兒何必強君看張夫人身舉十五喪
頭上脫笄珥篋中斥襦裳築墳連丘山松柏鬱蒼蒼
親戚不爲助涕泣感道傍昔有王氏老身爲尚書郎
親死棄不葬簪裾日翱翔白骨委廬陵宦遊在岐陽
一旦有丈夫軒軒類佯狂相面識心腹開口言災祥
嗟汝平生事不了令誰當汝身暖絲綿汝口甘稻梁

衣食未嘗廢此事乃可忘一言中肝心投身拜其床
傍人漫不知相視空茫茫終言汝不悛物理久必償
兒女病手足相隨就淪亡鄙夫本愚悍過耳風吹墻
明年及前期長子憂肝瘍一麾守巴峽雙柩還故鄉
弱息雖僅存蹒跚亦非良誰言天地寬網目固自張
古事遠不信近事世所詳企張非求福禍敗當懲王

嘉祐末年李士寧言王君事於右扶風其報甚速張
夫人南都人孔推官常甫作詩言其賢邀余同作并
言孛生事或
足以警世云

次烟字韻答黃庭堅

病卧江干鬚帶雪老捻書卷眼生烟貧如陶令仍耽

酒窮似湘纍不問天令弟近應憐廢學大兄昔許叩
延年比聞蔬茹隨僧供相見能容醉後顛
魯直兄舊於齊州以養生見教

東軒長老二絕 并序

始余於官舍營東軒彭城曹君煥子文自浮光訪
余於高安道過黃岡家兄子瞻以詩送之曰君到
高安幾日廻一時抖擻舊塵埃贈君一籠牢收取
盛取東軒長老來君過廬山見圓通知慎禪師出
詩示之師嘗與余通書見之欣然明日謂君昨見
黃州詩通夕不寐以一偈繼之曰東軒長老未相

逢却見黃州一信通何用揚眉資目擊須知千里
事同風吾野人不能數爲書君爲我誦之而已君
旣至未暇及此客有自廬山至者曰慎師送客出
門還入丈室燕坐而寂君乃具道其事余感之作
二絕其一以答子瞻其二以答慎也

東軒正似虛空樣何處人家籠解盛縱使盛來無處
著雪堂自有老師兄

子瞻新築東坡雪堂

檐頭挑得黃州籠行過圓通一笑開却到山前人已
寂亦無一物可擔廻

題方子明道人東窓

紙窓雲葉淨香篆細烟青客到催茶磨泉聲響石餅
禪關敲每應丹訣問無經贈我刀圭藥年來髮變星

次前韻

閉門何所事毛髮日青青齒折登山屐塵生貫酒餅
調心開貝葉救病讀難經定起無人見寒燈一點星

迎寄王適

投竄千山恨不深扁舟夏涉氣如烝重來疋馬君何
事歸去飛鴻我未能養氣經年惟脫粟讀書終夜有
寒燈安心且作衰慵伴海底鯤魚會化鵬

王度支陶挽詞二首

風蹟殊不昧聲名豈偶然長途催駉驥爽氣激鷹鷂
蕙苾成遺恨松楸卜遠年淒涼故吏盡誰泣鬣封前

其二

京塵昔傾蓋江國見佳城零落舊冠劍艱難孝弟兄
存亡看世俗意氣憶平生曉鐸知人恨幽音亦未平

次韻陳師仲主簿見寄

朽株難刻畫枯葉任凋零舊友頻相問村醪獨未醒
山才收細茗江實得流萍頗似申屠子都忘足被刑

寄題江渙長官南園茅齋

白髮辛勤困小邦塵勞坐使壯心降河陽罷後成南

圃彭澤歸來卧北窓
畦畔草生親荷鋪床頭
酒熟自傾缸
因君遣我添歸興
舊有茅茨濯錦江

詠霜二首

江南雪不到
霜露滿山村
紙被欺氈厚
茅簷笑瓦温
何曾凝去沼
淥有意隔朝暾
底日身無事
高眠不出門

其二

清霜欺客病
乘夜逼窓扉
坐睡依爐暖
細聲聞葉飛
蕉絺空滿篋
砧杵旋催衣
起看庭前草
松筠未覺非

次韻吳厚秀才見寄

壯心摧折漸無餘
早歲爲文老不如
登木求魚知我拙
循窠覓兔笑君踈
清尊獨酌夜方半
白髮潛生歲欲除
久恐交親還往絕
床頭猶喜數行書

乾荔支

含露迎風惜不嘗
故將赤日損容光
紅消白瘦香猶在
想見當年十八娘

次韻王適元日并示曹煥二首

井底屠酥浸舊方
床頭冬釀壓瓊漿
舊來喜與門前客
終日同爲酒後狂
老大心情今已盡
塵埃鬢髮亦無光
江南留滯歸何日
萬里逢春思故鄉

放逐三年未遣回，復驚爆竹起春雷。祈年粗有樽中
桂，寄遠仍持嶺上梅。莫笑牛狸抵羊酪，漫將崖蜜代
官醅。二君未肯嫌貧病，猶得衰顏一笑開。

寄梅仙觀楊智遠道士

道師近在真人峯，欲往見之路無從。去年許我入城
市，塵埃暗天待不至。莫往莫來勞我心，道書寄我千
黃金。蠶衣肉食思慮短，文字滿前看不見。口傳指授
要有時，脫去羅網當見之。梅翁漢朝南昌尉，手摩龍
鱗言世事。一朝拂衣去不還，身騎白麟翳紅鸞。我今
雖復墮塵土，道師何不與我語。他年策足投名山，相

逢拍手一破顏

春雪

溫風吹破臘，留雪惱新春。信逐殘梅到，花從半夜勻。
旋消微覆瓦，狂下亦欺人。壓竹時聞落，埋萱久未伸。
山川濛不解，樓觀洗成新。擁褐僧方睡，開門客屢嘔。
爨烟知歲稔，履迹笑吾貧。畦凍初生韭，泥融正賣新。
寒魚爭就汕，濁酒頗無巡。預喜田宜麥，槃飡餅餌頻。

贈石臺問長老二絕

并叙

石臺長老問公本成都吳氏子，棄俗出家手書法
華經字細如黑蟻。前後若一將誦之，萬遍雖老而

精進不倦脇不至席者二十有三年余來高安以
鄉人相好蓋余懶而好睡見之惕然自警因贈之
二小詩云

法達曾經見老盧半生勤苦一朝虛心通口誦方無

礙笑把吳鸞細字書

蜀中藏經往往有古仙人吳采鸞細書經卷精妙可愛

蒲團布衲一繩床心地虛明睡自亡長伴空中月天
子東方行道到西方

和毛國鎮白雲莊五詠

掬泉軒

卜築高深已有山起居清潤可無泉穿牆白練秋聲

細照屋清銅曉色鮮已放魚蝦媮跳擲更除蘋藻任
漪漣只應明月中霄下長共禪心相向圓

平溪堂

清溪似與隱君謀故入堂前湯不收盥手從今休汲
井浮觴取意便臨流花漂澗谷來應遠石激琴箏久
未休莫把朱欄強圍繞山家事事要清幽

眺遠臺

山似高人長遠人不登高處見無因築臺土石無多
子照眼峯巒得許新陣馬奔騰時絕遠風濤舒卷忽
無垠白雲自是逃名處猶恐此中藏隱淪

濯纓菴

臨池濯足惜泉清纓上無塵且強名橫木為橋便獨
往結茅依島類天成往還漸少人誰識寢食無為身
轉輕有似三吳朱處士釣魚誰與話西征

白雲莊偶題

歸去携家住白雲雲中猿鶴許同羣陶公酒後詩偏
好疎傳金餘客屢醺芒屨潛行逐漁釣壺漿時出勞
耕耘却看人世應微笑未熟黃梁晝夢紛

次韻王適落日江上二首

寒烟冪清江漁唱扁舟上江轉少人家自此知安往

維舟倚叢薄明月獨相向欲曉醉應醒還逐輕鷗颺

其二

稍息南市喧初上東山月潛魚忽驚踴饑雁時斷絕
落葉誤投籤繁霜疑積雪苦寒良難久愛此元氣潔
張秀才見寫陋容

潦倒形骸山上樗每經風雨輒凋踈勞君為寫支離
狀異日長看老病初落筆縱橫中自喜賦形深穩妙
無餘偶然挂壁低頭笑俱幻何妨彼亦如

同王適曹煥遊清居院步還所居

身為江城吏心似野田叟尋僧忽忘歸飽食莫携手

畏人久成性路繞古城後茅茨遠相望雞犬亦時有
人還市井罷日落狐兔走迴風吹橫烟燒火卷林藪
草深徑漸惡荆棘時挂肘褰裳涉沮洳斜絕汙池口
投荒分岑寂歎側吾自取二君獨何為經歲坐相守
遊從乏車騎飲食厭菘韭周旋未忍棄辛苦亦何負
歸來倚南窓試挹樽中酒笑問黃泥行此味還同否

子瞻謫居齊安自臨臯亭遊東坡路過黃泥坂作黃泥坂詞二君皆新自齊安來故云

次韻王適春雨

久遭客禁往還稀風雨蕭條只自知春色有情猶入
眼客愁無賴巧侵眉山僧寄語收茶日野老留人供

社時久住不須嫌寂寞此間偏與拙相宜

和子瞻蜜酒歌

蜂王舉家千萬口黃蠟為糧蜜為酒口銜澗水拾花
鬚沮洳滿房何不有山中醉飽誰得知割脾分蜜曾
無遺調和知與酒同法試投麴蘖真相宜城中禁酒
如禁盜三百青銅愁杜老先生年來無俸錢一斗徑
須囊一倒餽糟不聽漁父言煉蜜深愧仙人傳掉頭
不問辟穀藥忍饑不如長醉眠

次韻講律李司理憲見贈

強將羔雁聘黃晞破褐疎巾倚夕暉禮律縱橫開卷

盡鑿鹽冷落待賢非日高几案弦歌罷夜永窓扉燈
火微猶喜江邊莫春近舞雩風雨得同歸

次韻王適遊陳氏園

宿雨晴來春已晚衆花飄盡野猶香舞雩便可同沂
上飲襖何妨似洛陽新圃近閭穿沼濶漲江初喜放
舟長年來簿領繁人甚何計相隨入醉鄉

答孔平仲二偈

熟睡將經作枕頭君家事業太悠悠要須睡著元非
睡未可昏昏便爾休

龜毛兔角號空虛既被無收豈是無自有真無遍諸
有燈光何礙也嫌渠

次韻柳真公閑居春日

春寒漸欲減衣綿雨勢冥冥水拍天一局無言消日
永新詩得意許人傳惜花田地應慵掃護筍藩籬可
細編好事報君知我喜同官欲到得閑眠

次韻王適東軒卽事三首

新竹依墻未出尋墻東桃李却成林池塘草長初饒
夢村落鶯啼恰稱心江滿船頭朝欲轉泥融屐齒莫
尤深閉門憐子成書癖試買村醪相伴斟

眼看東隣五畝花茅簷竹戶野人家過墻每欲隨飛

蝶歸舍誰憐已莫鴟幽客偶來成晚飯野僧何日寄
新茶三年氣味長如此歸計遲遲也自嘉

北園春草徑微微未用頻教翦棘茨蜂陣紛紛初養
蜜鶯巢淺淺欲生兒客情流水兼山遠歸夢遊絲向
日遲懶病相將渾欲慣賴君索我強裁詩

送李憲司理還新喻

采芹芹已老浴沂沂尚寒蒯緱長嘆息首肯正闌干
黃卷心憂易青衫行路難歸耕未有計且復調閑官

問黃藥長老疾

四大俱非五蘊空身心河岳盡消鎔病根何處容他

住日夜還將藥石攻

復次烟字韻答黃大臨庭堅見寄二首

水竹遮藏自一川日高茅屋始炊烟犬牙春米新秋
後麥粒烝茶欲社天冠蓋只今成棄物杉松他日記
栽年定應笑我勞生在卯睡聞呼衣爲顛

十載勞思寤寐間新詩態度比雲烟清風吹我無千
里明月隨人共一天歸去林泉應避暑北征道路恐
經年與君共愧知時鶴養子先依黑栢顛

次韻子瞻臨臯新葺南堂五絕

江聲六月撼長堤雪嶺千重過屋西一葉軒昂方斷

渡南堂蕭散夢寒溪

旅食三年已是家堂成非陋亦非華何方道士知人意授與爐中一粒砂

北牖清風正滿床東坡野菜湯充腸華池自有醍醐味文室仍聞簷蔔香

隣人漸熟容賒酒故客親留爲種蔬住穩不論歸有日船通何患出無車

客去知公醉欲眠酒醒寒月墮江烟床頭復有三升蜜貧困相資恐是天

次韻王適大水

高安昔到歲方閏大水初去城如墟危譙墮地瓦破裂長橋斷纜船逃遁漂浮隙穴亂羣蟻奔走沙礫摧嘉䟽里間破散兵火後飲食弊陋魚蝦餘投荒豈復有便地遇災祗復傷羸軀人言西有蛟蜃穴閏年每與風雷俱漫溝溢壑恣游蕩傾崖拔木曾須臾鷄豚浪走不復保老椎裸泣空長吁滯留再與茲水會淪胥未哂斯民愚人生所遇偶然耳得失何用分錙銖

贈三局能師二絕

得失從來似偶然因師聊復問行年此生竟墮陰陽數方信修行力未全

旅食江千秋復春歸耕未遂不勝貧憑師細考何年
月可買山田養病身

臨川陳憲大夫挽詞二首

一時冠蓋盛臨川直亮推公益友先淡泊朱絲初少
味蕭疎翠竹久彌鮮崎嶇處世曾何病奔走成功亦
偶然天理更疎終不失雍雍今見子孫賢

五月扁舟憶過門哀憐逐客為招魂開樽不惜清泉
潔揮汗相看白雨翻病起清言驚苦瘦歸休尺牘尚

相存秋風灑涕松楸外談笑猶疑對竹軒

公家有竹軒
輒嘗賦詩

次韻知郡賈蕃大夫思歸

江城漂泊最多時邂逅誰令長者期得坎浮槎應有
命投林驚鵲且安枝何年笑語還留客終日勤勞數
問兒鈴閣清虛非此比秋風歸興恐非宜

久不作詩呈王適

憐君多病仍經暑笑我微官長坐曹落日東軒談不
足秋風北棹意空勞懶將詞賦占鴉臆頻夢江湖把
蟹螯筆硯生塵空度日他年何用繼離騷

喜王鞏承事北歸

同罪南遷驚最遠乘流北下喜先歸謂言一笑秋風
後却顧千山驛路非嶺外雲烟隨夢遠江邊魚蟹為

人肥還家嫁女都無事卧讀詩書盡掩扉

予初到筠卽於酒務庭中種竹四叢杉二本及

今三年二物皆茂秋八月洗竹培杉偶賦短篇

呈同官

種竹成叢移出簷二年慰我病厭厭翦除亂葉風初
好封植孤根笋自添高節不知塵土屨堅姿試待雪
霜露屬君留取障斜日仍記當年此滯淹

和王鞏見寄三首

南遷春及秋江湖未云半逮此歸路長始悟行日遠
幽憂脫沉痼清夢驚婉婉行行逢故人笑語雜悲泣

其二

江秋北風多歸帆未應駛天寒雁南向家書空滿紙
契濶幸安平婚嫁須纓珥志遊何爲者空復念君至

其三

折葉每安心連環非所計感君扁舟返念我一廬廢
懷思樂全老疇昔忘言契丹砂儻已成白首願終惠

復次韻

滕王閣在誰携手徐孺湖寬可放情楚客解書南國
恨秦箏助發上林鶯繫匏獨負杯中物擁鼻知逢洛
下生問得長鬚添夢想蓬窓燈火達天明

近遣僕至
鍾陵還言

定國與黃君魯直會於舟中燈火終夜而去

孔毅父封君挽詞二首

交契良人厚家風季婦賢詩書中有助癘藻歲無愆
象服期他日恩封屬此年神傷自不覺吊客問潛然
其二

別日笑言重歸來藥餌憂鍾歌掩不試貝葉亂誰收
恨極囊封在情多壘木稠埋文應自作一一記徽猷

上高息軒起亭二絕

山下清谿谿上市谿光山色映人烟幽亭正在人聲
裡長與谿山共寂然

溪父起收罾下鯉山翁起賣焙中茶長官亦與人
起笑擁黃紬放早衙

九月十一日書事

東墻瘦菊早開花九日金釵已白嘉黍麥候遲初響
甕米鹽法細未還家潑醅昨夜驚泉湧洗盞今晨聽
婦誇歸採茱萸重一醉不須怪問日時差

和王適寒夜讀書

久從市井後百事廢不理感君讀書篇惜此寒夜晷
殷勤附燈燭黽俛就圖史逡巡揖虞夏汗漫馳劉李
斯文家舊物早歲夙從事一從慕羶腥中棄如弊屣

今夕亦何夕忽如舊遊至終篇再三歎推枕不成寐
人生無百年所欲知有幾懸知未必得奔走若趨市
微言寄翰墨開卷入心耳胡爲棄不收所逐在難覲

和王適新葺小室

向日堂東一室存竹爲窓壁席爲門心如白月光長
照氣結丹砂體自溫飯軟莫嫌紅米賤酒香故取淡
醅渾他年一笑同誰說伴我三年江上村

病中賈大夫相訪因遊中宮僧舍二首

江城寒氣入肌膚得告歸來強自扶五馬獨能尋杜
老一床深愧致文殊體虛正覺身如幻談劇能令病

自無明日出門還擾擾年來真畏酒家壚

東隣脩竹野僧家亂柳枯桑一徑斜逐客慣曾手短
策使君何事駐高牙蕭條已似連村塢邂逅應容設
晚茶慙愧病夫無氣力隔墻空聽吏兵譁

和王適炙背讀書

少年讀書處寒夜冷無火老來百事慵炙背但空坐
眼昏愁細書把卷惟恐卧寒衣補故褐家釀熟新糯
微微窓影斜暖暖雲陰過昏然偶成寐鼻息已無奈
兒童更笑呼書冊正前墮衰懶今自由不復問冬課

同王適賦雪

北風吹雨雨不斷
遍滿虛空作飛霰
紙窓獨卧不成
眠茅屋無聲時
一沚鳥鳥錯莫寒
未起庭戶空明夜
驚旦重樓複閣爛
生光絕澗連山滂
不見夾砌雙杉
洗更碧浦田碧草
埋應爛城中閉戶
無履迹市上孤
烟數晨爨細排玉
箸短垂簷暗結輕
冰時入研撥灰
有客顧尊俎迹免
何人試鷹犬未容
行役掃車轂應
有老農歌麥飯一
來江城若俄頃四
見白花飛面旋
坐看酒甕誰敢嘗
歸踏水泥屢成濺
年來橋板斷不
屬莫出肩輿足憂
患到家昏黑空自
笑想婦勤勞每
長嘆牀頭有酒未
用沽囊裡無錢不
勞筭更令雪片
大如手終勝溪瘴
長熏眼謁告猶能
不出門典衣安
子成高謙

樂城集卷之十二

清夢軒

樂城集卷之十三

宋 西蜀蘓轍子由著

明 東吳王執禮子敬校

詩八十六首

除夜

老去不自覺歲除空一驚深知無得喪久已罷經營
黃卷譏前失清樽借後生何年遂踈懶伏臆任躬耕

種蘭

蘭生幽谷無人識客種東軒遺我香知有清芬能解
穢更憐細葉巧凌霜根便密石秋芳早叢倚脩筠午

陰涼欲遣靡無共堂下眼前長見楚詞章

上元夜

新春收積雨明月澹微雲照水踈燈出因風遠樂聞
天涯仍有節人事竟何分賣酒真拘束何時一醉醺

次韻王適上元夜二首

燈光欲凝不驚風月色初晴若發蒙羈客不眠詩未

就遊人半醉夜方中荒城熠燿相明滅野水芙蓉亂

白紅知欲訪僧同寂寂應憐病懶畏熅熅

宿雨初乾試火城端居無計伴遊行厭看門外繁星

動想見僧窓一點明老罷逢春無樂事夢回孤枕有

鄉情重因佳句思樊口一紙家書百鎰輕

王子立與遲等遊陳家園橋敗幾不成行晚自

酒務往見之明日雨作偶爾成詠

桃李城東近不遙偶聞花發喜相邀斷橋似欲妨佳

思好雨猶能借此朝隨分開樽依綠草偶然信馬及

餘瓢重來莫道無閑暇紫燕黃鸝日漸嬌

幽蘭花

李徑桃蹊次第開穠香百和襲人來春風欲擅秋風

巧催出幽蘭繼落梅

珍重幽蘭開一枝清香耿耿聽猶疑定應欲較香高

下故取羣芳競發時

胡長史祠堂

白首青衫仍隱居晚拋環堵就安輿生芻忽改烹嘗
地函丈空悲講解餘弟子璵璠相照耀兄孫松桂共
扶踈我來恨不瞻遺老空怪鄉隣盡讀書

孫賓叟道人

萬里飄然不繫舟酒壚一笑便相投千金不換金丹
訣何事惟須一布裘

新橋

六月長橋斷不收朱欄初喜映春流虹腰宛轉三百

尺鯨背參差十五舟入市樵漁看絡繹歸家鹽酪免
遲留病夫最與民同喜卯酉忽忽無復憂

曾子宣郡太挽詞二首

族大徽音遠年高福祚多生兒盡龍虎封國裂山河
象服驚初斡埋文信不磨送車江郭滿咽絕聽哀歌

其二

安輿遍西北丹旄歷江湖存沒終無憾哀榮兩得俱
新封崇馬鬣餘福薦浮圖家法蘋蘩在空堂始一虞

曾子固舍人挽詞

少年漂泊馬光祿末路騫騰朱會稽儒術遠追齊稷

下文詞近比漢京西平生碑版無容繼此日銘詩誰
爲題試數廬陵門下士十年零落曉星低

次韻王適一百五日太平寺看花二絕

遍入僧房花照眼細尋芳徑蝶隨行歸時不怕江波
晚新有橋虹水上橫

小檻明窓曾不住閑花芳草遺誰栽但須匹馬尋幽
勝携取清樽到處開

又次韻遊小雲居

溪上浮花片片輕泝流登岸得山行僧房幽絕雲居
小春日陰晴野色明永遠林棲真有道溺沮耕養亦

忘情此身此意何年遂空使常談笑老生

次韻秦觀梅花

病夫毛骨日凋槁愁見米鹽惟醉倒忽傳騷客賦寒
梅感物傷春同懊惱江邊不識朔風勁墻頭亦有南
枝早未開素質夜先明半落清香春更好鄰家小婦
學閑媚靚粧惟有長眉掃孤芳已與飛霰競結子仍
先百花老苦遭橫笛亂飛英不見遊人醉芳草可憐
物性空自知羞作繁華助苦昊

復次前韻答潛師

憐君古木依巖槁西江飲盡須彌倒野花幽草亦何

爲嶮韻高篇空自惱萬點浮溪輒長嘆一枝過嶺仍
誇早拾香不忍遊塵汗嚼蕊更憐真味好道人遇物
心有得瓦竹相敲緣自掃誰知真妄了不妨令我至
今思璉老妙明精覺昔未識但向閑窓看詩草浮雲
時起鳥四飛畢竟安能亂清昊

景福順老夜坐道古人搐鼻語

中年聞道覺前非邂逅仍逢老順師搐鼻徑參真面
目掉頭不受別鉗鎚枯藤破衲公何事白酒青鹽我
是誰慚愧東軒殘月上一盃甘露滑如飴

畫枕屏

繩床竹簟曲屏風野水遙山霧雨濛長有灘頭釣魚
叟伴人閑卧寂寥中

次韻王適留別

遠謫勞君兩度行復將文字試平衡干時豈爲斗升
祿聞道應忘寵辱驚未了新書誰與讀重留佳句不
勝情决科事畢知君喜俗學消磨意自清

次韻子瞻特來高安相別先寄遲适遠却寄邁
迨過遜

老兄騎驪日百里據鞍作詩若翻水忽吟春草思惠
連因之亦夢添丁子羣兒競長堪一笑老馬卧餐何

日起聞兄盡室皆舊人見面未曾惟遜耳遲年最長
二十六已能幹父窮愁裡豫兒揚眉稍剛勁黨子溫
純無愠喜我兄憔悴我亦窮門戶久長真待爾但令
戢戢見頭角甕倒囊空定何耻家藏萬卷須盡讀此
外一簪無所恃船中未用廢詩書閉窓莫看江山美
次韻子瞻端午日與遲适遠三子出遊

人生逾四十朝日已過午一違少壯樂日迫老病苦
丹心變為灰白髮粲可數惟當理鉏耰教子執耒耜
誰令觸網羅展轉在荆楚平生手足親但作十日語
朝遊隔提携夜卧因烝煮未歌棠棣詩已治芻靈祖

士生際風雲富貴若騎虎奈何貧賤中所欲空齟齬

次韻子瞻留別三首

公來十日坐東軒手自披雲出朝日山川滿目竟何
有波浪翻天同一濕諸門迭出驚異狀間道懷歸終
舊壁此行十里隔江河何人更問維摩疾

野人性似修行僧長願幽居近林麓南遷無計脫簪
組西歸誰爲栽松竹頭上白雲卽飛蓋耳畔清泉當
鳴玉洛川猶是冠蓋林更願高飛逐黃鵠

東西南北無住身羯末封胡四男子彫鏤不遣治章
句爛熳先令飽文字踈慵嗟我厲之人生子夜中惟

恐似傳家粗足不願餘同駕柴車還我里

次韻子瞻行至奉新見寄

四年候公書長視飛鴻背十日留公談欲作白蓮會

筠州無可語者往還但一二僧耳匏瓜一遭繫賣酒長不在夜歸步

江濬明月照清瀨心開忽自得語異竟非背音倍一尊

談入間萬事寂寥外欲同千里行奈此一官礙何年

真耦耕舉世無此大

贈醫僧鑒清二絕

肘後醫方老更精鬚眉白盡氣彌清只應救病能無病豈是平生學養生

門人久作開堂老庭檜看成合抱圍他日浴堂歸洗背回頭還解放光輝

贈醫僧善正

老怯江邊瘴癘鄉城東時喜到公房歷言五藏如經眼欲去三彭自有方身厭遠遊安靜術因多病更深長時時爲我談尊宿曾入南公古道場

食菱

野沼漲清泉烏菱不直錢蟹肥螯正滿石破髓初堅節物秋風早樽罌夜月偏令人思淮上小舫藕如椽留滯高安四年有餘忽得信聞當除官真楊間

偶成小詩書于屋壁

數間茅屋久蹉跎四見秋風入薜蘿北棹偶然追雁
羽南公誰復伴漁蓑三年賈傅驚吾老九歲劉郎愧
爾多此去仍家江海上不妨一葉弄清波

洪休上人少年讀書以多病出家居泐潭爲馬
祖修塔以三絕句來謁答一首

早除郎將少年狂祖塔結緣歸故鄉習氣未消餘業
在逢人依舊琢詩章

勉子瞻失幹子二首

人生本無有衆幻妄聚耳手足非吾親何況妻與子

偶來似可樂強作室家喜忽去未免悲欣成要矜毀
君家兩歲兒畢竟何自始變化違初心涕泗劇翻水
吾儕近始悟造物聊復試道力竟未完聰明信難恃
破甑不復顧彼無愛甑心棄璧負赤子始驗愛子深
誠知均非我胡爲有不能一從三界遊久被百物侵
朝與喜怒交莫與寵辱臨四物比以不勝生死獨未曾
不經大火燒孰爲真黃金棄置父子恩長住旃檀林
偶遊大愚見餘杭明雅照師舊識子瞻能言西
湖舊遊將行賦詩送之

五年賣鹽酒勝事不復知城東古道場蕭瑟寒松姿

出遊誠偶爾相逢亦不期西軒吳越僧弛擔未多時
言住西湖中巖谷涵清漪却背閭井喧曲盡水石奇
昔年蘓夫子杖屨無不之三百六十寺處處題清詩
麋鹿盡相識况乃比丘師辯淨二老人精明吐琉璃
笑言每忘去蒲褐相依隨門人几杖立往往聞談詞
風雲一解散變化何不爲辯入三昧火卯塔長松歌
淨老不復出塵尾清風施蘓公得罪去布衣拂霜髭
空存壁間字鬱屈屈蟠蛟螭知我卽兄弟微官此棲遲
問何久自苦五斗寧免饑俛首笑不答且爾聊教嬉
我兄次公狂我復長康癡反復自爲計定知山中宜

但欲畢婚娶每爲故人疑君歸漫灑掃野鶴非長羈

將移績溪令

坐看酒壚今五年恩移巖邑稍西還他年貧富隨天
與何日身心聽我閒山栗似拳應自飽蜂糖如土不
須慳仲卿意向桐鄉好身後丞嘗亦此閒

約洞山文老夜話

山中十月定多寒纔過開爐使出山堂衆久參緣自
熟郡人迎請怪忙還問公勝法須時見要我清談有
夜闌今夕客房應不睡欲隨明月到林間

將之績溪夢中賦泊舟野步

扁舟逢野岸試出步崇岡山轉得幽谷人家餘夕陽
被畦多綠茹堆屋剩黃梁深羨安居樂誰令志四方
謝洞山石臺遠來訪別
竄逐深山無友朋往還但有兩三僧共遊渤澥無邊
處扶出須彌最上層未盡俗緣終引去稍諳真際自
虛澄坐令顛老時奔走竊比韓公愧未能

贈方子明道人

水銀成銀利十倍丹砂爲金世無對此人斬術不肯
傳闔戶泥墻畏天戒今子何爲與我言人生貧富寧
非天鉗鎚橐籥枉心力齏鹽布被隨因緣我來江西
晚聞道一言契我心所好廓然正若大虛空平生伎
倆都除掃子言舊事淨慈師未斷有爲非淨慈此術
要將救饑耳人人有命何憂饑

回寄聖壽聰老

五年依止白蓮社百度追尋丈室遊睡待磨茶長展
轉病蒙煎藥久遲留贊公夜宿詩仍作巽老堂成記
許求回首萬緣俱一夢故應此物未沉浮

乘小舟出筠江二首

短舫漂浮真似葉小蓬低淺僅如巢幽吟但覺山川
走困睡不知風雨交紅飯白醪供醉飽青篲黃筍可

纏包一竿鶴髮他年事萬斛龍驤任見嘲
宦遊欲學林間鵲每到新年旋疊巢蓬筍籠船聊似
屋漁樵把臂便成交不妨袖裡携詩卷尚可床頭置
藥包古史欲成身愈困客來未免答譏嘲

寄題孔氏顏樂亭

顏巷久已空顏井固不遷荆榛翳蔓草中有百尺泉
誰復飲此水裹飯耕廢田有賢孔氏孫芟夷發清源
廢床見纒刻古甃昏苔痕引缸注瓢樽千歲忽復然
嗟哉古君子至此良獨難口腹不擇味四體不擇安
遇物一皆可孰爲我憂患阮生未忘酒嵇生未忘鍛

欲忘富貴樂託物僅自完無託中自得嗟哉彼誠賢

徐孺亭

徐君鬱鬱澗底松陳君落落堂上棟澗深松茂不遭
伐堂毀棟折傷其躬二人出處勢不合譬如日月行
西東胡爲賓主兩相好一榻挂壁吹清風人生遇合
何必同一朝利盡更相攻先號後笑不須怪外物未
可疑心胸比干諫死微子去自古不辨汗與隆我來
故國空嘆息城東舊宅生茅蓬平湖十頃照清廟獨
畫徐子遺陳公二人皆合配社稷胡不相對祠堂中

滕王閣

客從筠溪來歆又困一葉忽逢章貢餘混蕩天水接
 風霜出洲渚草木見毫末勢奔西山浮聲動古城業
 樓觀却相倚山川牙開闔心驚魚龍會目送鳧雁滅
 遙瞻客帆久更悟江流濶史君東魯儒府有徐孺榻
 高談對賓旅確論精到骨餘思屬湖山登臨寄遺堞
 驕王應笑滕狂客亦憐勃萬錢罄一飯千金賣豐碣
 豪風相凌蕩俳語終倉猝歐陽文忠公嘗云王勃記
 文似俳而唐人貴之如此
 何事往空長江人來逐飛楫短篇竟蕪陋絕景費彈
 壓但當倒罌瓶一醉付江月

次韻道潛南康見寄

一葉追隨魚與龍紅粳白酒奉年豐也知山色遙不
 待苦畏君詩欲見攻乘興風帆終日去尋幽蠟屐及
 春同請君先入開先寺待濯清溪看玉虹

車浮

并序

結木如巢承之以簣沉之水中以浮識其處方舟
 載兩輪挽而出之漁人謂之車浮此詩所謂汕也
 與遲适同作車浮詩

寒魚得汕便為家兩兩方舟載小車謀食旋遭芳餌
 誤求安仍值積薪遮情存未免人先得欲盡要令物
 莫加身似虛舟任千里世間何處有浮宜

題都昌清隱禪院

北風江上落潮痕，恨不乘舟便到門。
樓觀飛翔山斷際，松筠陰翳水來源。
升堂猿鳥晨窺坐，乞食帆檣莫遶村。
誰道谿巖許深處，一番行草認元昆。

長老惟湜曾識子瞻

兄於淨因有簡刻石

逢章戶掾赴澧州

江船不厭窄，船窄始宜行。
風裏長先過灘頭，一倍輕迎親。
無惡處，祿養勝躬耕。
澧上春蘭早，猶堪吊屈生。
除夜泊彭蠡湖遇大風雨

莫發鄴陽市，曉榜彭蠡口。
微風吹人衣，霧遶廬山首。

舟人釋篙笑，此是風伯候。
杙舟未及深，飛沙忽狂走。
暗空轉車轂，淥水起岡阜。
衆帆落高張，斷纜已不救。
我舟舊如山，此日亦何有。
老心畏波濤，歸卧塞窓牖。
土囊一已發，萬竅無不奏。
初疑丘山裂，復恐蛟蜃鬪。
鼓鍾相轟虓，戈甲互磨叩。
雲霓黑旗展，林木萬弩發。
曳柴眩人心，振旅擁軍後。
或爲羈雌吟，或作倉兕吼。
衆音雜呼吸，異出殊圈臼。
中宵變疑冽，飛霰集粉糅。
蕭騷蓬響乾，晃蕩窓光透。
堅凝忽成積，澎湃殊未究。
紵縞鋪前洲，瓊瑰琢遙岫。
山川莽同色，高下齊一覆。
淵深竄魚鼈，野曠絕鳴雉。
孤舟四鄰斷，餘食數升糗。

寒齏僅盈盞腊肉不滿豆
弊裘擁衾眠微火拾薪構
可憐道路窮坐使妻子詬
幽奇雖云極岑寂頃未覯
一年行將除茲歲真浪受
朝來陰雲剝林表紅日漏
風稜恬已收江練平不縐
兩槳舞夷猶連峯吐奇秀
同行賀安穩所識問癯瘦
驚餘空自憐夢覺定真否
春陽着城邑屋瓦凍初溜
艱難當有償爛熳醉醇酎
正旦夜夢李士寧過我談
說神怪久之草草爲
具仍以一小詩贈之
先生惠然肯見容旋買鷄
豚旋烹炙人間飲食未須
嫌歸去蓬壺却無喫

舟中風雪五絕

北風吹雪密還稀雪勢漸多風力微
孤棹獨依銀世界山川路絕欲安歸
曉風吹浪作銀山夜雪爭妍布玉田
風力漸衰波更惡通宵撼我正安眠

擁纜埋蓬不見船船窓一點莫燈然
幽人永夜歌黃竹賴有丹砂暖寸田

濁醪麤飯不成歡白浪飛花雪作團
窓外時來一雙鴨沉浮笑我不禁寒

江面澄清雪未融扁舟蕩漾水無蹤
篙師不用忽忽

去遍看廬山羣玉峯

題南康太守宅五老亭

五老高閑不入城
開軒肯就史君迎
坐中莫著閑賓客
物外新成六弟兄
雲氣飄浮衣袂舉
泉流灑落佩環聲
爰然終日俱無語
靜壽相看意自明

書廬山劉顥官苑屋壁三絕

一作陪南康太守訪廬山劉顥官苑

留題三絕

山西舊將本書生
歸老巖間未厭兵
卧聞布水中宵起
錯認邊風萬馬聲

雕弓挂壁耻言勲
出入樵漁便作羣
五馬親來看射

虎不愁醉尉惱將軍

肩輿已棄躡風騅
舊物仍存楊柳枝
一曲清歌近尤好
五陵故態未全衰

再遊廬山三首

當年五月訪廬山
山翠溪聲寢食間
藤杖復隨春色到
寒泉頓與客心閑
巖頭懸布煎茶足
峽口驚雷泛葉慳
待得前村新雨遍
扁舟應逐好風還

憶自栖賢夜入城
道邊蘭若一僧迎
偶然不到終遺恨
特地來遊慰昔情
海外聲聞安至此
堂中天鼓為誰鳴
忽忽復向深山去
一盞醍醐飽粟罌

羅漢院有新羅羅漢

堂中法
鼓特大

此山巖谷不知重赤眼浮圖自一峯芒躋隨僧踐黃
葉曉光消雪墮長松石泉試飲先師錫午飯歸尋下
寺鐘勝處轉多渾恐忘出山惟見白雲濃

汲陽阻風

鐘陵距池陽相望千里內江神欺我貧屢作風雨礙
欲投皖公宿三日逢一噫孤篷面空山朝食淡無菜
白醪幸餘瀝黃卷漫相對饑吟非吾病疾走老所戒
焦先近不遠蝸舍聞尚在區區問養生借我一帆快

張嘉祐

道人何爲者陽狂時放言寶塔昔所構鉄券今尚存
此張所言其湯浪難究悉孰知彼根源草菴劣容膝
俯仰拳肩跟無食輒行乞一飽常閉門爾來二十年
未嘗變寒温嗟哉豈徒然此意未易言偶來一笑喜
但恐笑我昏

效韋蘓州調嘯詞二首

漁父漁父水上微風細雨青篔簹蓑衣紅酒白魚
莫歸莫歸莫歸歸莫長笛一聲何處
歸雁歸雁飲啄江南南岸將飛却下盤桓塞北春來
苦寒苦寒苦寒寒苦藻荇欲生且住

至池州贈陳鼎秀才

淮陽學舍舊相依常誦曹溪第一機却到江西心有
悟回看過去事皆非孤舟遠適身如寄二頃躬耕道
自肥欲看齊山君去否閑中徒侶近來稀

次韻遲初入宣河二首

遠客安長道低蓬稱小溪雲添濕帆雨舟滯沒蒿泥
草綠耕牛健村深候鳥啼陶翁方作令歸去未成題

次韻侯宣州利建招致政汪大夫

社甕壺漿接四鄰肩輿拄杖試紅塵慣眠林下三竿
日來看城中萬井春世上升沉無限事樽前強健不

貲身經過已足知公政長見車中有老人

次韻侯宣城疊嶂樓雙溪閣長篇

作官如負擔一負當且弛不知息肩處妄問道遠邇
我乘章江流却入宛溪水捨舟陟崔嵬行路極句已
名都便欲過佳處賴公指仰攀疊嶂高俯閱雙溪美
不悟身乘空但覺風吹耳雲烟變遙壑歌吹聞近市
倦遊得清曠行役有新喜公言頃榛穢斬伐從我始
堰水種蒲蓮開山蒔梅李擁本待成陰養花要食子
遺風揖桓謝父老邀黃綺邦人魚依蒲食客莪在芷
春陰迫寒食謂我姑且止嗟余去鄉國屢把刀環視

感公鵠鷺脩憐我鳧鴨庠異邦逢故人寧復固辭理
高談雲漢上爛醉笙歌裡落日盡公歡推挽未應起
初到績溪眎事三日出城南謁二祠遊石照偶
成四小詩呈諸同官
行年五十治丘民初學催科愧廟神無限青山不容
隱却看黃卷自憐貧雨餘嶺上雲披絮石淺溪頭水
蹙鱗指點縣城如手大門前五柳正搖春

右梓桐廟

石門南出衆山巔沃壤清溪自一川老令舊諳田事
樂春耕正及雨晴天可憐鞭撻終無補早向叢祠乞

有年歸告仇梅省文字麥苗含穗欲蚕眠

右汪王廟

行盡清溪到碧峯陰崖翠壁畫杉松故留石照邀行
客上徹青山最後重

雨開石照正新磨鳥度猿攀野客過忽見塵容應笑
我年來底事白鬚多

右石照二首

縣中諸花多交代江君所栽牡丹已過芍藥方

盛偶寄小詩

偶來山邑便成家慚愧潘生滿縣花想見清樽檻邊

飲尚留佳句壁間誇根株未老年年好艷施穠日日
加聞道北遊無意味春深河上足風沙

楊主簿日本扇

扇從日本來風非日本風風非扇中出問風本何從
風亦不自知當復問大空空若是風穴既自與物同
同物豈空性是物非風宗但執日本扇風來自無窮
次韻答人幽蘭
幽花耿耿意羞春紉佩何人香滿身一寸芳心須自
保長松百尺有爲薪

次韻江法曹山間小酌

高情不柰簿書圍行揖青山肯見隨綠野逢花將盡
日清樽迨我正閑時簷間雙燕欲生子葉底新梅初
滿枝笑殺華陽窮縣令床頭酒盡只嘔眉

官舍小池有鷓鴣遺二小雛二首

半畝清池藻荇香一雙鷓鴣競悠揚來從碧澗巢安
在飛過重城毋自將野鳥似非官舍物宰君昔是釣
魚郎直言愧比奇章老得縣無心更激昂

清池定誰至鷓鴣自來馴知我無傷意憐渠解托身
橋陰棲息穩島外往來頻勿食遊魚子從交長細鱗
次韻答人見寄

對案青山雲氣騰天將隙地養無能窓扉迎署梅將
溜虛市無人冷欲冰寂默忘言慚社燕毡毳困睡比
春鷹深知大府容衰病復值年來蚕麥登

次韻答人檻竹

猗猗元自直落落不須扶密節風吹展清陰月共鋪
叢長傲霜雪根瘦耻泥塗更種愁無地應須煎碧蘆

樂城集卷之十三

清夢軒

樂城集卷之十四

宋 西蜀蘓轍子由 著

明 東吳王執禮子敬 校

詩八十五首

次韻王荐推官見寄

可憐衰病孰為媒私喜隣邦得雋才玉案愧無酬錦
繡木瓜却用報瓊瑰風流似欲傳諸謝格律猶應學
老梅始信山川出才士扁舟新自宛溪來

荐宣人也

郭尉愿停夫以琳上人書詩為示次韻

勉強冠裳四十餘同官早歲亦山居朝來過我三竿

日袖有幽僧數紙書家住一廬何計反官供五斗未
應無聞渠秋後來相訪脫粟藜羹只自如

次韻汪琛監簿見贈

連宵暑雨氣如秋過客不來誰與遊賴有澹臺肯相
顧坐令彭澤未能休棊疎不辦彈新曲學廢誰令致
束修慚愧邑人憐病懶共成清淨勸遲留

周昉畫美人歌

深宮美人百不知飲酒食肉事遊嬉彈絲吹竹舞羅
衣曲終對鏡理鬢眉爰然高髻玉釵垂雙鬟窈窕
葉微宛轉躑躅從嬰兒倚楹俯檻皆有姿擁扇執拂

知從誰瘦者飛燕肥玉妃俯仰向背樂且悲九重深
遠安得窺周生執筆心坐馳流傳人間眩心脾飛瓊
小玉雲霧幃長風吹開忽見之夢魂清夜那復追老
人衰朽百事非展卷一笑亦胡爲持付少年良所宜

病中郭尉見訪

偶成三日寒兼熱知是多聞力未全却問藥王求妙
劑慙非摩詰已虛圓勞公強說修行漸顧我方爲病
垢纏應是床頭有新酒欲邀佳客故留連

病後

一經寒熱攻骸骨正似兵戈過室廬柱木支撐終未

穩筋皮收拾久猶踈芭蕉張王要須朽雲氣浮游畢
竟虛賴有衣中珠尚在病中點檢亦如如

復病三首

病作日短至病消秋氣初山深足氣瘴俗儉少肴蔬
藥亂曾何補心安當自除朝廷閱流落已是脫遷居

其二

寒作埋冰雪熱攻投火湯今生那有此宿業未應亡
委順一無損力爭徒自傷頽然付一榻是處得清涼

其三

一病五十日復爾當解官不才歸亦樂無食去猶難

黽勉人應笑低徊意已闌舊師摩詰老把卷靜中看

送琳老還大明山

身老與世踈但有世外緣五年客江西掃軌謝往還
依依二三老示我馬祖禪身心忽明曠不受垢污纏
偶成江東游欲別空悽然緣散衆亦去飄若風中烟

高安三長老與之甚熟別後文老去洞山聰老去聖壽全老化去

華陽本荒邑緇素

明星懸偶然得老尉舊依育王山璉公善知識不見

十九年我昔未聞道問以所入門告我從信入授我

普眼篇冉冉百尺松起自一寸根南歸髮盡白尺書

今始傳不知鄰邑中乃有門人賢百里走相訪觸熱

汗雨翻懷中出詩卷清絕如斷蟬我適病寒熱氣力
才綿綿空齋默相向欲語不能宣未暇答佳意歸錫
鏘金環空有維摩病愧無維摩言

病退

冷枕單衣小竹牀卧聞秋雨滴心涼此間本淨何須
洗是病皆空豈有方示疾維摩元自在放身南嶽離
思量病根欲去真元在中夜夢遊何有鄉

病後白髮

枯木自少葉不堪經曉霜病添衰髮白梳落細絲長
筋力從凋朽肝心罷激昂勢如秋後雨一度一淒涼

答琳長老寄幽蘭白朮黃精三本二絕

谷深不見蘭生處追逐微風偶得之解脫清香本無
染更困一嗅識真如

老僧似識衆生病久在山中養藥苗白朮黃精遠相
寄知非象馬費柔調

次韻候宣城題疊嶂樓

小邑來時路宣城最近隣樓臺百年舊花竹一番新
登覽春深日凝思病後身何時對樽酒重為洗埃塵
初聞得校書郎示同官三絕

讀書猶記少年狂萬卷縱橫曬腹囊奔走半生頭欲

白今年始得校書郎

百家小邑萬重山慙愧斯民愛長官粳稻如雲梨棗熟暫留聊復為加食

病後濁醪都少味老來歡意苦無多臨行寂寞空相對不作新詩柰客何

績溪二詠

豁然亭

南看城市北看山每到令人意豁然碧瓦千家新過雨青松萬壑正生烟經秋卧病聞斤響此日登臨負酒船徑請諸君作佳句壁間題我此詩先

翠眉亭

誰安雙嶺曲彎彎眉勢低臨戶牖間斜擁千畦鋪淥水稍分八字放遙山愁霏宿雨峯巒濕笑卷晴雲草木閑忽憶故鄉銀色界舉頭千里見蒼顏

辭靈惠廟歸過新興院書其屋壁

來時稻葉針鋒細去日黃花黍粒麤久病終慙多散政豐年猶喜慰耕夫青山片片添紅葉淥水星星照白鬚東觀校讐非老事眼昏那復競鉛朱

郭尉惠古鏡

凜如秋月照虛空遇水留形處處同一瞬自成千億

月精神依舊滿胸中

俗言以鏡予人損已精神故解之云

歙縣歲寒堂

檻外甘棠錦繡屏長松何者擅亭名浮花過眼無多日勁節凌寒盡此生暗長茯苓根自大旋收金粉氣尤清長官不用求琴譜但聽風吹作弄聲

邵武游氏老人三清堂紫芝

黑龜赤鳳早逢師白髮蒼顏老不衰丹鼎一丸深自秘紫芝三葉却先知烟熏晴日雲容薄色凝秋霜玉性竒何日刀圭救羸病盡芟荆棘種交梨

神宗皇帝挽詞二首

稽古堯無作勤邦禹有功政新天地力事改漢唐風禮樂寰中盛梯航海外通華封徒有誦龍御忽乘空

其二

承平終不處副託重艱難統接神孫正人依聖母安橋山封劔佩原廟見衣冠萬國纏哀處嵩陽檜栢寒

其三

取士忘踈賤量書廢寢興芻言本何益玉殿最先登日角依稀想堯言涕泗稱龍髯遠莫及零淚凍成冰舟過嚴陵灘將謁祠登臺舟人夜解及明已遠至桐廬望桐君山寺縹緲可愛遂以小舟遊之

作二絕

扁舟忽草出山來慚愧嚴公舊釣臺舟子未應知此恨夢中飛楫定誰催

嚴公釣瀨不容看猶喜桐君有故山多病未須尋藥錄從今學取衲僧閒

沂潮二首

潮來海若一長呼潮去蕭條一吸餘初見千艘委泥土忽浮萬斛沂空虛映山少避曾非久借勢前行却自如天地尚遭人意料乘時使氣定麤疎
疋練縈回出海門黃泥先變碧波渾初來似欲傾滄

海正滿真能倒百源流枿飛騰竟何在扁舟睥睨久仍存自慚不作山林計來往終隨萬物奔

贈王復處士

候潮門外王居士平昔交遊遍海涯本種杉松為老計晚將亭榭付隣家為生有道終安隱好事來遊空嘆嗟猶有東坡舊詩卷忻然對客展龍蛇

兄弟名之曰種德其亭頃以貧故鬻之矣

王若舊有園亭子瞻

張揚山人即昔所謂惠思師也余舊識之於京師忽來相訪茫然不復省徐自言其故戲作二

小詩贈之

昔日高僧今白衣人生變化定難知故人相見不相識空怪解吟無本詩

聽誦長江近章句喜逢澄觀已冠巾醉吟揮弄清潮水誰信從前戒律人

次韻子瞻送楊傑主客奉詔同高麗僧遊錢塘人言長安遠如日三韓住處朝日赤飛帆走馬入齊梁却渡吳江食吳橘玉門萬里唯言九行人淚墮陽關酒佛法西來到此間遍滿曾如屈伸手出家王子身心虛飄然渡海如過渠遠來忽見傾盆雨屬國真逢戴角魚至人無心亦無法一物不見誰為敵東海

東邊定有無拍手笑作中朝客

寄龍井辯才法師三絕 并叙

轍自績溪蒙恩召還將自宣城沿大江以歸家兄子瞻以書告曰不如道歛溪過錢塘一觀老兄遺迹轍用其言既至吳中迫於水涸不能久留十月八日遊上天竺子瞻昔與辯才師相好今隔南山不得見乃作三小詩以寄之

我兄教我過東吳遺墨山間無處無忽報冬潮催出

漚俗緣深重道心麤

山色青冥葉未紅湖光凝碧曉無風行窮上下兩天

竺望斷南山龍井龍
井水中藏東海魚側盆翻雨洗凡夫隔山欲共公相
見莫道從來一滴無

元絳參政挽詞

吳越朝天功在民當年卿相亦仁人曾孫終與元豐
政政老猶知異代因吏治清明開白日文詞俊發吐
青春鄴都從事堂中客涕灑高原栢子新

過王介同年墓

平生使氣坐生風徐叩方知學有功應奉讀書無復
忘虞翻忤物自其窮埋根射策久彌奮投老為邦悍

莫攻墳木未須驚已拱少年我亦作衰翁

昔與中南同登制科

僕年最少今已老矣

將遊金山寄元長老

麤砂施佛佛欣受怪石供僧僧不嫌空手遠來還要
否更無一物可增添

元老見訪留坐具而去戲作一絕調之

石霜舊奪裴休笏坐具只今君自留留放書房還會
否受降曾不費戈矛

元老和示小詩自謂非戰之罪復作一絕并坐
具還之

請君却領彌天具不欲終收陷虎名莫道昏沉非戰
罪何如不戰屈人兵

子瞻與長老擇師相遇於竹西石塔之間屢以
絕句贈之又留書邀轍同作遂以一絕繼之

遠老陶翁好弟兄虎溪溪廬阜又逢迎何須更要經平
子清議從來貴士衡

高郵贈別杜介供奉

淮南魚米年年賤直便歸休無俸錢錦背圖書何益
事塵生弦筦正參禪逢人未廢一樽酒送客長隨百
里船世上得如君自在不須開府事開邊

幾先去年送家兄子

瞻至高郵今年復留此相別

答王定國問疾

五年竄南荒頑質不伏病吸清吐濁穢氣練骨隨勁
澹然久忘歸寂寂就遐屏國恩念流落牽挽界隣境
葉舟泝長江藤鞋過重嶺峽深蕙蘿惡山嶮崖石橫
恢召夏初發氛霧秋愈盛蒸薤食有時豚羔詎曾省
門開訟氓入日晏鳩舌競肝脾得寒熱水炭迫晨暝
俚醫固空踈蠻覲劇麤猛老妻但坐哭遺語未肯聽
長子亦在床一卧昏不醒思歸未可得卽死副前定
如如性終在冉冉歲將冷筋骸稍輕安冠服強披整

餘方厭苓朮日食禁醪茗髮衰亂隨櫛骨瘦空看影
簿書勉復親環玦非所請馬老固伏櫪槎流舊安井
凌競就輕車邂逅出脩綆此生誠夢幻俛仰成吊慶
故人枉新詩萬里慰孤耿賞音我非曠斲鼻君真郢
南遷昔所同卧疾今亦並遠行信由天未死庸非命
歸舟正飄兀齋舍念清淨作書附鴻翼去路瞻斗柄
聞水漸安流吳音未全正一樽對清言及此冬夜永
和子瞻次孫覺諫議韻題郡伯闡上斗野亭見
寄
扁舟未遽解坐待兩闡平濁水汙人思野寺為我清

昔遊有遺咏枯墨存高麗故人獨未來一樽誰與傾
北風吹微雲莫寒依月生前望邗溝路却指鐵甕城
茅簷卜茲地江水供晨烹試問東坡翁畢老幾此行
奔馳力不足隱約性自明早為歸耕計免慙老僧榮

僧榮斗野主人也子瞻將卜居丹陽蒜山下此亭正當歸路故云爾

次韻子瞻題泗州監倉東軒二首

肩輿嫋嫋渡浮梁吏隱知君寄一倉十里遙看飛皂
蓋小軒相對有壺漿清霄往往投車轄永日霏霏散
篆香留滯淮南久仍樂莫年何意復為郎
萬斛塵飛日為霾無心退食自成齋梅生紅粟初迎

與坡集 卷十四 三三三
臘魚躍銀刀正出淮卧病空看帆度磧誦詩猶記雪
填堦夾河南北俱形勝且借高城作兩崖

答顏復國博

歲晚河水留畫船一軒脩竹喜蕭然詩詞溫厚新成
格道論精微近入禪病後不勝清醕醖別時仍得舊
書傳欲成古史須咨考陋巷何因接尺椽

次韻王定民宣德

彭城寺壁看詩來顏氏瓢樽偶共開茅屋未完先鑿
沼竹林成後想宜梅新詩妙絕難爲繼高論微低得
共陪第一詞人生不識茲行尚喜揖君才

河水

扁舟多艱虞與我平日類初乘滂洋流旋涉凍淺地
日西陰風作夜半流漸至悄然孤寂枕覺此凝冽氣
河聲噤不喧燈花結復墜忽來觸舟去聲與裂帛似
平明發窓扉吏卒殪未起奔騰陣馬過洶湧晴雲駛
紛紛散環玦卷卷浮席被匯流忽騰蹙曲岸相撐抵
欹危起丘山汗漫接洲沚連艘恣凌轆千楫競紛委
剛強初悍頑潰散終寂靡掃除就虛曠沿泝弄清泚
我行無疾徐乘流得坎止偶然追還期愧此墮千指
陰陽有定數開塞亦常理窮冬治舟行嗟此豈天意

復賦河水四絕

客心凜凜怯寒水擁褐無言夜漏深
河伯似知歸意速風號西北故相禁

春來歸夢劇飛鳧夜半流澌擁舳艫
似勝去年彭蠡口雪封廬岳浪翻湖

朝來縣令借長船仍遣千夫上下牽
不惜瓊瑤分衆手貪看雪片滿河壩

輕紵破碎珮環流顛倒鏘鳴亂觸舟
解紼投篙曾不顧不知何處擁汀洲

河水稍解喜呈王適

留滯江湖白髮生西歸猶苦凍崢嶸
春風未到水先解河水初深船自輕
去國偶然經晝夢逢人稍欲問都城
羈鴻共有成行喜雙鯉應將尺素迎

河水復結復次前韻

懊惱河水散復生徂年近已失崢嶸
身留短舫厭厭睡目送飛鴻一一輕
引緯低徊疑上坂打凌辛苦甚攻城
東風憐我歸心速稍變楊梢百里迎

題南都留守妙峯亭

我登妙峯亭欲訪德雲師春陽被原野
澗渙含流澌未復桃李色稍增松桂姿
子子東來檣冉冉將安之

萬物委天運此身免奔馳
悵然懷舊遊一丘覆茅茨
清冷久沮洳文雅空頽隳
提携二三子醉倒春風吹
不見妙峯處安知德雲期
南遷久忘反有獲空自知
歸來覽新構恍然發深思
遠行極南海此地初不移
酌我一斗酒盡公終日嬉
德雲非公歟相對欲無詞
次韻發運路昌衡淮南見山堂
疊石初成得賜環未應苔蘚上
蒼顏據鞍華岳旌旄
裡回首淮山夢想間
烽火日傳西塞靜
丘陵應伴壯
心閑終南太白皆公有
肯向庭中更作山

送戴朝議歸蜀中

岷山招我早歸來
劍閣橫空未易回
北叟忽驚鷓鴣
晚西轅欲及海棠
開避仇賦客親耕
耒因亂詩翁著
酒杯但愛江山無
一事爲言父老莫
相猜

後省初成直宿呈子瞻二首

掖垣初罷斧斤響
棟宇猶聞松桂香
江海暫來俱野
客雲霄並直愧華
堂月明似與人烟
遠風細微聞禁
漏長諫草未成眠
未穩始知天上極
清涼
射策當年偶一時
對床夜雨失前期
廬間還往無多
地夢裏追尋亦自
疑螭墨屢乾朝已
久囊封希上出
猶遲茅簷半破松
筠老歸念蕭然欲
語誰

次韻子瞻送陳睦龍圖出守潭州

海上石橋餘折棟大舶記君過鐵甕東行萬里若乘
空老蜃長鯨應入鞆波搖風卷卧不起免教髀肉鞍
磨痛歸來過我話艱苦驚汗津津尚流汞海涯風物
畫成圖錯落天吳兼紫鳳至今想象隔人世往往風
濤吹晝夢長沙欲往厭飛楫幸有千兵作迎送文章
清逸世少比科第崢嶸聲自重遠行屢屈衆所歎出
祖誰攀車欲動明朝鼓角背玉城莫聽單于吹曉弄

子雍奉使三韓轍時在南
都見其往返故此詩言之

送千之姪西歸

京洛東遊歲月深相逢初喜解微吟夢中助我生池
草別後同誰飲竹林文字承家憐女在風流似舅慰
人心便將格律傳諸弟王謝諸人無古今

駕幸親賢宅贈隨駕諸公

日日南風夜氣煩一聲鳴趨萬人看禁溝飛水清黃
道涼殿分冰遍從官急雨未成昏觀闕微颺稍覺泛
和鑾相看揮汗塵埃裡散髮何人舊不冠

次韻子瞻飲道者院池上

雨氣涼侵殿河流滲入池黃梁淪魚子白酒瀉鶩兒
風細初生袖塵清免汗眉郊行不易得拂壁看題詩

答孔平仲惠蕉布二絕

裘葛終年累已輕薄
蕉如霧氣尤清應知浣濯衣稜
敗少助晨趨萃蔡聲

燈籠白葛扇裁純身似山僧
不似官更得雙蕉縫直
掇都人渾作道人看

次韻朱光庭司諫喜雨

焦枯連夏火洗濯待秋霖
都邑溝渠淨郊原黍豆深
流膏侵地軸晴意動風琴
誰似臣居易先成喜雨箴
次韻光庭省中書事

放浪江湖久情慵安排誰置從
官中麤踈空與延和

對開納初還正觀風二鄙兵消
真帝力四方雨足自
天功時將一勺傾滄海
湯使人知達四聰

送張恕朝奉南京簽判二首

楚蟹吳柑初著霜
梁園官酒試羔羊
老如計相非無
齒清似留侯未却糧
杖屨稍通賓客過
殺蔬要遣子
孫嘗詔書委曲如公意
幕府新除朱紱郎

朱紱還家罷倚門
留都無事最宜親
下車趨走驚隣
舍決獄平反慰老人
相見只今多邂逅
舊遊他日半
埃塵何年重起扁舟
與會作東湖十日賓

送賈訥朝奉通判眉州

歸念長依落日邊壺漿今見逆新官聲傳已覺謳歌
遍身到前知政令寬民病賢人來已暮時平蜀道本

無難明年我欲脩桑梓為賞庭前荔子丹
眉州倅廳舊有荔支

二株甚大

次韻黃庭堅學士狸毛筆

不悟身邊一斗紅聖賢隨世亦時中何人知有中書
巧縛送能書陳孟公

李誠之待制挽詞二首

脫遺章句事經綸滿腹龍蛇自屈伸南駕威聲傳絕
域西征舊恨失姦臣空留諫疏驚頽靡終託詩詞話

苦辛直氣如雲未應盡一雙嗣子亦麒麟

濟南風物在西湖湖上逢公初下車談笑樽前伏齊
虜旌旗門外聽除書一封未奏先焚草三黜歸來便

種蔬淚落西堂歌酒地杉松空見歲寒餘

可馬溫公挽詞四首

白髮三朝舊青山一布衾封章留帝所德澤在人心
未起謳吟切來歸顧託深楊公不义住天意定難忱

其二

決策傳賢際危言變法初紛紛看往事一一驗遺書
富貴終何有清貧只自如西州不忍過行哭便回車

其三

區區非爲已懇懇欲忘生力盡心終在身亡勢亦成
遺民拋劍戟故老半公卿魏丙生前友俱傳漢相名
其四
少年真猶淺射策本麤踈欲廣忠言地先收衆棄餘
流離見更化邂逅捧除書趙孟終知厥他人恐罵予

送表弟程之元知楚州

與君外兄弟初如一池魚中年雲雨散各異澗谷居
客舍復相從語極長欷歔青衫奉朝謁白髮驚晨梳
百年不堪把一樽歡有餘清言我未厭昨夜聞除書

淮南旱已久疲民食田蔬詔發上供米仍疏古邗渠
要須賢使君均此積歲儲徑乘兩槩去不待五馬車
別離難重陳勞徠不可徐政成得召節歲晚當歸歟

送王震給事知蔡州

朝廷入忘返冠蓋如雲屯賢哉貴公子獨以民社言
西臺出命書落筆波濤翻東臺與封駁坐惜日月奔
試劇得上蔡高卧強東藩旱歲獨多麥時雨如傾盆
鈴軒省鞭扶幕府多壺樽逡巡文字樂斥去簿領煩
賜環行當至坐席恐未溫三槐日成陰富貴屬曾孫
送王廷老朝散知虢州

滿腹貯精神觸手會衆理一廢十五年直坐才多爾
我昔遊宋城憶始識君子簿書填丘山賓客亂蜂螳
出尋城下宅屢庭床前履清談如鋸木落屑紛相委
解頤自有樂置酒姑且止逡巡破黃封婉婉歌皓齒
風高熊正白霜落蟹初紫夜闌意未厭河斜客忘起
歸來笑僮僕熟醉未曾爾江湖一流蕩歡意日頽弛
西還經舊遊相逢值新喜詔催西州牧門有朱轡柅
都城挽不住山賊近方侈提刀索崖谷援桴動閭里
居家百無與王事非有已何日却休官復飲梁王市

送魯有開中大知洛州次子瞻韻

仲連雖不仕而非綺與園逡巡笑談間屢解戰鬪繁
子敬識二孫長揖鼓鞶喧意氣感周郎振策起江村
二賢繼英風千載爲高門曾孫事仁祖風義夙所敦
臺閣餘故事父老稱遺言白髮識公子十載友元昆
婆娑久不試俛仰色愈溫五馬忽嘶鳴朱輪夾征軒
旌旄隔河至部曲幾人存銅虎不可留芻狗行當燔
秋潦決河防遺黎化驚魂憂心念千里何暇把一樽
西城叩門別南風吹帽翻嗟我限出謁未敢逾短垣
新晴水尚壯想見民驚奔安得萬丈堤止此百里渾
姑爾救一境誰當理其源百聞貴一見尺書爲我論

樂城集卷之十四

清夢軒

樂城集卷之十五

宋 西蜀蘓轍子由 著

明 東吳王執禮子敬 校

詩八十五首

送陳侗同年知陝府

上書乞江淮得請臨關河所得非所願親友或相訶
 丈夫志四方所遇常逶迤况當國西屏形勝古來多
 崑渠湧北郭華岳垂東阿羗虜昔未平驛騎如飛梭
 間諜時出沒關梁苦誰何爾來一清淨西望多麥禾
 魏絳方和戎先零正投戈秦人釋重負道路聞行歌

便當臥齋閣次第除網羅時時一嘯咏未用勤催科
諸孤寄吳越食口如鴈鵝時分橐中金何必手自摩
次韻李曼朝散得郡西歸留別二首

風波定後得西歸烏鵲喧呼里巷知未熟黃梁驚破
夢相看白髮信乘危豚肩尚有冬深味蠶器應逢市
合時父老爲公留臘酒不須猶唱式微詩
懷印徒行尚故衣邸中掾史見猶疑千人上塚鄉關
動五馬行春雨澤隨醉裏墜車初未覺道中破甑復
誰悲西行漫遣親朋喜早賦陶翁歸去詩

送程建用宣德西歸

昔與君同巷參差對柴荆艱難奉老母弦歌教諸生
藜藿飽臧獲布褐均弟兄貧賤理則窮禮義日益明
我親本知道家有月旦評逡巡戶牖間時聞歎息聲
善惡不可誣孝弟神所聽我見此家人處約能和平
它年彼君子豈復地上行爾來三十年遺語空自驚
松阡映天末苦淚緣冠纓子親八十五皤然老人星
安輿及祿養平反慰中情月俸雖不多足備甘與輕
今年復考課得秩真代耕倚門老鶴望策馬飛鴻征
歸來歲云莫手奉屠蘓觥我詩不徒作以遺鄉黨銘

君昔嘗稅居與樊廬東西相望武昌君見其家事知非貧賤人也此語未嘗語人俛仰三十年矣因君西

歸作詩言之
不覺流涕

次韻子瞻杜介供奉送魚

天街雪霽初通駟禁籞冰開漸躍魚十尾煩君穿細
柳一杯勸我莩青蔬寒樽獨酌偶逢客佳句相酬不
用書江海歸來叨禁近空令同巷往來踈

次韻子瞻招王遠朝請晚飲

矯矯公孫才不貧白駒衝雪喜新春忽過銀闕迷歸
路誤認瑤臺尋故人訪我不嫌泥正滑留君深愧酒
非醇歸時九陌鋪寒月清絕空教僕御攀

子瞻與李公麟宣德共畫翠石古木老僧謂之

懋寂圖題其後

東坡自作蒼蒼石留取長松待伯時只有兩人嫌未
足更收前世杜陵詩

王君貺宣徽挽詞三首

妙年收賈傳白首貴王陽志氣文章在功名歲月長
遺孫依舊德故吏滿諸方河朔三持節斯民定不忘

其二

謫墮神仙侶飛翔鸞鳳姿舊逢黃石老陰許赤松期
歷歷僧伽記申申鄧傳詞翻然歸海嶠無復世人知

公少年過泗州於僧伽塔中見一老僧謂公歸跡祖
墓有白兔者君當第一人及第已而果然既登科見

張鄧公爲公言吾爲射洪令尉捕得一人疑其行劫
吾覺其非是釋之問其所從來則山中隱者也以藥
遺我曰服此藥可以終天年而無病且約我貴極人
臣今子方且貴慎勿答辱道人公終身用其言轍佐
公於大名親
見公言之

其三

從軍在河上仗鉞喜公來幕府方閑暇歌鐘得縱陪
它年老賓佐過國泣樓臺猶有墳碑在仍令故客開

今樞密安公厚卿昔與轍同在
幕府公家方求厚卿作墓碑

送杜介歸揚州

揚州繁麗非前世城郭蕭條却古風尚有花畦春雨
後不妨水調月明中東都甲第非嫌汝北牖羲皇自

屬翁清洛放船經月事急先題鳩遶芳叢

次韻子瞻與鄧聖求承旨同直翰苑懷武昌西

山舊遊

我遊齊安十日回東坡桃李初未栽扁舟亂流入樊
口山雨未止淫黃梅寒溪聞有古精舍相與推挽登
崔嵬山深縣令喜客至寺荒蔓草生經臺黃鵝白酒
得野餽藤床竹簟無纖埃可憐遷客畏人見共恠青
山誰爲堆行驚晚照催出谷中止亂石傾餘壘古今
相望兩令尹謂元結與鄧君也文詞灑落千山隈野人豈復
識遺趣過客時爲剡蒼苔五年留滯屐齒禿一朝揮

手船頭開玉堂却憶昔遊處笑問五柳應彫摧滿朝
文士蚤貴達馮凌霄漢乘風雷入叅祕殿出華省何
曾著足空山來漂流邂逅覽遺躅耳中尚有江聲哀
送楊孟容朝奉西歸

三十始去家四十初南遷五十復還朝白髮正紛然
故人從西來鞍馬何聯翩握手得一笑喜我猶生全
別離多憂患夢覺非因緣惟餘歸耕計粗有山下田
久糜太倉粟空愧鄉黨賢老兄富治行今德齊高年
幸此民事清未厭軍壘偏父老攜壺漿稚子迎道邊
應有故相識問我何當旋君恩闕表病歸駕行將鞭

次韻孔武仲學士見贈

羨君耽讀書日夜論今古雖復在家人不見釋手處
意求五車盡未惜雙目苦蓬萊倚霄漢簡冊充棟宇
學成擅困倉筆落走風雨破籠閉野鶴短草藏文虎
鬚鬚忽半白兒女無復乳知君不能薦愧我終何補
偶來相就談日落久未去歸鞍得新詩佳句爛如組
古風棄雕琢遺味比樂府且復調墳篋泠然五音舉

送家定國朝奉西歸

我懷同門友勢如曉天星老去髮垂素隱居山更青
退翁聯科第俯仰三十齡仕官守鄉國出入奉家庭

鵠鷺性本靜芷蘭深自馨新詩得高趣衆耳昏未聽
笑我老憂患奔走如流萍冠裳強包裹齒髮坐凋零
晚春首歸路朱轡照長亭縣令迎使君綵服導輜駟
長歎或垂涕平反知有令此樂我已亡雖達終不寧

次韻劉貢父省上示同會二首

流落江湖東復西歸來未洗足間泥偶隨鵬翼培風
上時得衙香滿袖攜落筆逡巡看傑直醉吟清絕許
分題相望魯衛雖兄弟終畏鄰封大國齊

掖垣不復限東西賓客來衝霧雨泥白酒黃封開漱
灑朱櫻青籠落提攜五花愧我連書判三道高君免

試題誰遣松蒿同一谷凌雲他日恐難齊

次韻孔武仲三舍人省上

君不見西都校書宗室叟東魯高談鼓瑟手偶然同
我西掖垣並立曉班分左右龍文百斛世無價屬二公
瓦釜枵然但升斗諸兄落落不可望兩季幸肯分餘
光大孔奮飛自南鄉聯翩羣鴈相追翔渠家冠蓋尤
堂堂

送顧子敦奉使河朔

去年送君使河東今年送君使河北連年東北少安
居慷慨憐君色自得河流西決不入土千里汗漫敗

原隰壯夫奔亡老稚死粟麥無苗安取食君憂臣辱
自古然自說過門三不入忠誠一發鬼神輔心念既
通謀計集堤防旋立村落定波浪欲收蛟蜃泣二年
歸國未爲久故舊相看髮猶黑成功豈在延世下好
勇真令腐儒服此時爲國頌河平當使君名長不沒
席上再送

人言虎頭癡勇作河朔遊黃河六七月不辨馬與牛
單車徑北渡橫身障西流虎頭亦不癡志在萬戶侯
徜徉歷二邊歸借坐上籌腰垂黃金印不受白髮羞
此計雖落落但問有志不臨岐且一醉行役方未休

次韻孔文仲舍人酴醾

蒼虵凍不死輕素暖仍歸落葉時吹面繁香自撲幃
光凝真照夜枝軟或牽衣似厭風霾苦應思霧雨霏
開樽迎最盛掃地見初稀賴有清陰在金波肯發揮
送錢承制赴廣東都監

家聲遠繼河西守遊宦多便嶺外官南海無波閑闕
舸北堂多暇得羞蘭忽聞常棣歌離索應寄寒梅報
好安它日扁舟定歸計仍將犀玉付江湍

次韻曾子開舍人四月一二日扈從二首

萬人齊仗足聲勻翠輦徐行不動塵夾道歡呼通老

穉從官雜選數徐陳旌旗稍放龍蛇卷旒冕初看日

月新天遣雨師先灑道農夫不復誤占辛農家常以辛占麥

辛深則麥熟今年正月八日得辛而雨不時應駕未出一日初得雷雨麥始有望

衣冠雙日款蓬萊簾脫瓊鉤扇不開清曉逮驚三殿

啟翠華遙自九天來晨光稍稍侵黃蓋瑞霧霏霏著

禁槐千兩翟車觀禮罷歸時滿載德風迴是日內外命婦皆會

景靈仰瞻三宮肅然雍穆不言而化諸公之家有能言之者

再和

病起江南力未勻強將冠劍拂埃塵木雞自笑真無

用芻狗何勞收已陳行從鑾旗風日細側聽廟樂管

絃新誰知四載勤勞後併舉成功祚泣辛

宸心惻惻念汗萊南籞西池閉不開長樂鳴鞘千乘

出顧成薦鬯萬方來從臣暗泣新宮柳父老行依輦

路槐雙闕影斜朱戶啟都人留看屬車回

次韻張昌言給事省中直宿

還家未暇拂塵衣攜被重來趁落暉省戶鳴騶久分

散宮槐栖鵲共翻飛周廬見日風霾靜斜漢橫空星

斗稀多病心身怯清禁故山依約夢西歸

次韻貢父子開直宿

擲簡搔毫氣吐虹興餘庭藥詠殘紅今宵文字知無

幾軒睡簾中笑二公

去年冬轍以起居郎入侍邇英講不逾時遷中

書舍人雖忝冒愈深而瞻望清光與日俱遠追

記當時所見作四絕句呈同省諸公

邇英肅肅曉霜清玉宇時聞槁葉零風過都城吹廣

內萬人笑語落中庭

銅鉸灑遍不勝寒雨點勻圓凍未乾回首矐矐朝日

上槐龍對舞覆衣冠

邇英前有雙槐甚高而柯葉拂地狀若龍蛇講官進對其下

早歲西廂跪直言起迎天步晚臨軒何知老侍曾孫

聖欲泣龍髯吐復吞

轍昔舉制策坐於崇政西廊蓋邇英之比也是日晚仁皇白延

和步入崇政過所試幄前瞻望天表最為親近

講罷淵然似不勝詩書默已契天心高宗問答終垂

世未信諸儒測淺深

次韻張問給事喜雨

已收蠶麥無多日旋喜山川同一雲禾黍趁時青覆

壠池塘流潤渌生文兩宮尚廢清晨集中禁初消永

夜薰倉粟半空民望足深耕疾耨肯忘君

次韻宋構朝請歸守彭城

得郡迎親願不違書來無復寄當歸馬馳未覺西南

遠鳥哺何辭日夜飛湖水欲平官舍好茶征初復訟

氓稀平反聞道加食飯五袴應須換破衣

次韻劉貢父西掖種竹

竹迷誰定知迷否趁取滂沱好雨初栽向鳳池吹律
處斲從芸閣殺青餘迎風一嘯朝回早弄月相差直
宿疎應恠籍咸林下客相看不飲作除書

仲馮方作左史必與

貢父並直於此

次韻劉貢父省中獨直

簾深巧為隔朝暎竹密時能引雀喧朝罷宿醒還續
夢靜中諸妄稍歸根坐曹聞道仍分省出沐誰當與
比軒竹簟茅簷它日事重因遺詠記君恩

得告家居次韻貢父見寄

君恩賜告許歸來雨後中庭有綠苔起問日高三丈
久臥聞車過九門開泥封連日傳新語腕脫知君有
軼才十八二十二兩日除目猥多待得晴乾追後乘未應塵土熱
如灰

黃幾道郎中同年挽詞二首

溫恭天賦此心良惠愛人知政術長井水無波任鉞
綆牛刀投隙應官商分符出遍名城守攜被歸從華
省郎不到汝陰遺恨遠坐令湖水減清光
早歲相從能幾時淮陽花發正游嬉鳴弓矍相人如

堵席地滄浪柳作帷十載舊游真是夢一時佳客尚

葬日車千兩漬酒綿中寄一悲轍昔與幾道相遇於

陳陳守張聖民相與游從甚密逮今將三十年當時賓客在者少矣而幾道復化去言之悽惻無已

和王定國寄劉貢父

度嶺當年惜遠行過淮今日似前生留連秋思江侵海搖蕩春心花滿城欲寄尺書慵把筆偶聞佳句獨含情何時復看清虛會醉聽篆筆促柱聲

故濮陽太守贈光祿大夫王君正路挽詞二首

落落承平佐英英嗣世風芝蘭託庭戶鸞鵠峙椅桐結客賢豪際傾財緩急中悲傷聞故老淪謝未衰翁

其二

吳中試良守濮上繼嘉聲平賦權家恨蠲租盜俗清家貧久未葬身去獨留名天報多男子終存好弟兄

韓幹三馬

老馬側立鬃尾垂御者高拱持青絲心知後馬有爭意兩耳微起如立錐中馬直視翹右足眼光已動心先馳僕夫旋作奔佚想右手正控黃金羈雄姿駿發最後馬回身奮鬣真權奇圍人頓轡屹山立未聽決驟爭雄雌物生先後亦偶爾有心何者能忘之畫師韓幹豈知道畫馬不獨畫馬皮畫出三馬腹中事似

欲譏世人莫知伯時一見笑不語告我韓幹非畫師

書郭熙橫卷

鳳閣鸞臺十二屏屏上郭熙題姓名崩崖斷壑人不
到枯松野葛相欹傾黃散給舍多肉食食罷起愛飛
泉清皆言古人不復見不知北門待詔白髮垂冠纓
袖中短軸纔半幅慘澹百里山川橫巖頭古寺擁雲
木沙尾漁舟浮晚晴遙山可見不知處落霞斷鴈俱
微明十年江海興不淺滿帆風雨通宵行投篙椽杙
便止宿買魚沽酒相逢迎歸來朝中亦何有包裹觀
闕圍重城日高困睡心有適夢中時作東南征眼前

欲擬要真物拂拭束絹付與汾陽生

題王生畫三蠶蜻蜓二首

饑蠶未得食宛轉不自持食聲響如雨但食無復知
老蠶不復食矯首有所思君畫三蠶意還知使者誰
其二

蜻蜓飛翾翾向空無所著忽然逢飛蚊驗爾饑火作
一飽困竹稍凝然不覺真莫若無饑渴患何貴一簞樂

贈寫真李道士

君不見景靈六殿圖功臣進賢大羽東西陳能令將
相長在世自古獨有曹將軍嵩高李師掉頭笑自言

弄筆通前身百年遺像誰復識滿朝冠劍多偉人據
鞍一見心有得臨牕相對疑通神十年江海鬚半脫
歸來俛仰慚簪紳一揮七尺倚牆立客來顧我誠似
君金章紫綬本非有綠蓑黃筍甘長貧如何畫作白
衣老置之茅屋全吾真

次韻子瞻題郭熙平遠二絕

亂山無盡水無邊田舍漁家共一川行遍江南識天
巧臨牕開卷兩茫然
斷雲斜日不勝秋付與騷人滿目愁父老如今亦才
思一蓑風雨釣槎頭

次韻錢勰待制秋懷

壯心老自消秋思悲不怨中懷不堪七那用日食萬
朝陽淨塗潦白露霑草蔓夾衣搜故褚酒債積新券
狙猿便林藪冠帶愁檻圈夢追赤松游食我青精飯
歸心久已爾佳句聊復勸近聞洸東將聞出邊馬健
禪王坐受縛右袂行將獻念此愧無功歸歎適吾願

宿滎陽審氏園

喧卑背城市曠蕩臨溪水車流泝絕壁河潤及桃李
居人有佳思過客得新喜中橋一回顧欲入迷所自
滎陽唐高祖太宗石刻像

并叙

榮陽大海院高齊石像二高不數寸而姿製甚妙
唐高祖爲鄭州刺史太宗方幼而病甚禱之卽愈
因各爲一碑刻彌勒佛且記其事至今皆在元祐
二年九月祭告永裕陵過而觀焉作小詩以授院
僧

誰言膚寸像勝力妙人天欲療衆生病陰扶濟世賢
身微須覆護眼淨照幾先豈爲成功報猶應歷劫緣

次韻劉貢父從駕

一經空記弟傳兄舊德終慙比長卿
肩駕聯翩來接武登科先後憶題名竹林共集
子棣亭相輝賴

友生它日都門俱引去不應廣受獨華榮

次韻劉貢父和韓康公憶其弟持國二首

霜風瑟瑟卷梧蕉燕處超然夜寂寥羽客信來丹鼎
具石淙夢斷水聲遙赤松作伴誰當見黃鵠高飛未
易招劒履終身定何益勤勞付與沛中蕭

愛君憂世老彌深特操要須得失臨晚歲飛騰推有
德故鄉安穩信無心小邦近似西山隱元氣終當北
斗斟聖主方求三世舊老臣何止一遺簪

聞京東有道人號賀郎中者唐人也其徒有識
之者作詩寄之

賀老稽山去不還鏡湖獨棹釣魚船南來太白尋無處却作郎官又幾年岱下迎鸞驚典謁蒙山施藥豎耕田試窮脚力追行迹亦使今生識地仙

送家安國赴成都教授三絕

城西社下老劉君春服舞雩今幾人白髮弟兄驚我在喜君游宦亦天倫

徽之先生門人惟僕與子瞻兄復禮與退翁兄皆位耳

垂白相逢四十年猖狂情味老俱闌論兵頓似前賢語莫作當年故目看

石室多年款誌平新書久溷里中生遣師今見朝廷意文律還應似兩京

送歐陽辯

我年十九識君翁鬚髮白盡顛頰紅奇姿雲卷出翠阜高論河決生清風我時少年豈知道因緣父兄願承教文章疎略未足云舉止猖狂空自笑公家多士如牛毛揚眉抵掌氣相高下客逡巡愧知己流枿低昂隨所遭却來京洛三十載重到公家二君在伯亡仲逝無由追淚落數行心破碎京城東西正十里雨落泥深旱塵起衣冠纏繞類春蠶一歲相從知有幾去年叔爲尚書郎家傳舊業行有望今年季作澶淵吏米鹽騷屑何當起前輩今無一二存後來幸有風

流似黃河西行淤沒屋桑柘如雲麥禾熟年豐事少
似宜君飽讀遺書心亦足

送韓康公歸許州

功成不願居身退有餘勇心安里間適望益縉紳重
朝爲北闕辭莫犯南河凍人知疎公達王命顯父送
百壺山泉溢千兩春雷動旋聞二季賢繼以一章控
印書未云可廷論已季竦茲行迫寒食歸及掃先塋
人擁道看一子腰金從爾曹勿驚嗟令德勸勤種
三日上辛祈穀除日宿齋戶部右曹元日賦三
絕句寄呈子瞻兄

七度江南自作年去年初喜奉椒槃久來誤入文昌
省連日齋居未許還

今歲初辛日正三明朝春氣漸東南還家強作銀幡
會雪底蒿芹欲滿籃

北客南來歲欲除燈山火急萬人扶燈山例以北欲
觀翠輦巡游盛深怯南宮鎖鑰拘使見日立

次韻王欽臣祕監集英殿并

碧甃涵雲液銅瓶響玉除汲花攢點罷灑霧喚班初
龍餅煎無數螭研滴有餘從官方醉飽一酌解清虛
集賢殿考試罷二首

振鷺紛紛未著行初從江海覘清光卷聲風雨中庭
起筆勢雲煙累幅長病眼尚能分白黑衆毛空復數
驪黃禁中已許公孫第得失何私物自忙
衰病相侵眼漸昏青燈細字苦勞神遍看大軸知無
力聽誦奇篇賴有人前日鼓旗聞苦戰明朝雷雨出
潛鱗殿廬困極唯思睡却憶登科似後身

問蔡肇求李公麟畫觀音德雲

好事桓靈寶多才顧長康何嘗爲人畫但可設奇將
久聚要當散能分慰所望清新一大士界我夜燒香

五月一日同子瞻轉對

羸病不堪金束腰永懷江海舊漁樵對床貪聽連宵
雨奏事驚同朔旦朝大耿功名元自異中茅服食舊
相要一封同上憐狂直詔許昌言賴有堯

次韻劉貢父題文潞公草書

鷹揚不減少年時墨作龍蛇紙上飛應笑學書心力
盡臨池寫遍未裁衣

韓康公挽詩三首

閎闕元高世功名自發身堂堂揖真相矯矯出稠人
許國心先定輕財物目親傳經比韋氏世世得良臣
其二

耆年時一二新第闕西南好客心終在忘懷日縱談
規模人共記風味我猶諳誰是羊曇首回車意不堪

其三

師曠聞弦日相如作賦年雖慙衆人後貪值主文賢
北道初聞召南江正遠遷平生闕親近遺恨屬新阡
送王宗望郎中赴河東漕

春初戎馬掠河壩屬國倉皇不解鞍未免驅民餽邊
食旋聞奉使輟郎官年高轉覺精神勝慮穩要令事
業安持節近看葱嶺雪擁裘應慣鴈門寒

送高士敦赴成都兵鈐

楊雄老病久思歸家在成都更向西邂逅王孫馳驛
騎丁寧父老問耕犁禪房何處不行樂壁像君家有
舊題德厚不妨三世將時平空見萬夫齊

盧鴻草堂圖

昔爲大室遊盧巖在東麓直上登封壇一夜蛩生足
徑歸不復往巒壑空在目安知有十志舒卷不盈幅
一處一盧生裘褐蔭喬木方爲世外人行止何須錄
百年入篋筇犬馬同一束嗟予縛世累歸來有茅屋
江干百畝田清泉映脩竹尚將逃姓名豈復上圖軸
秦虢夫人走馬圖二絕

秦虢風流本一家豐枝穠葉映雙花欲分妍醜都無處夾道遊人空嘆嗟

朱幘玉勒控飛龍笑語誼譁步驟同馳入九重人不見金鈿翠羽落泥中

韓幹二馬

玉帶胡奴騎且牽銀驥白鼻兩爭先八坊龍種知何數乞與岐邠並錦韉

試制舉人呈同舍諸公二首

垣中不減臺端峻池上來從柱下嚴同直舊曾連月久暫來還喜二公兼僕頃與孫莘老同在諫垣與彭器資同在西掖直言已

許侵彈奏新告行聞振滯淹顧我麤官何所與西門只合論茶鹽

早歲同科止六人中年零落半埃塵却將舊學收新進幾誤今生是後身骭髒別都遺老驥沉埋祕府愧制科前輩今獨張公安道一人後來未用惟張去華而已憐君尚勝劉蕢在白首諸侯呼上賓

次韻張去華院中感懷

登朝已老似王陽脫葉何堪霧雨涼案上細書憎蟻黑禁中新酒愛鵝黃臨堦野菊偏能瘦倚檻青松解許長仕宦不由天祿閣坐曹終日漫皇皇轍頃自續溪除校書

郎未至京除右司諫
竟不入館故以為恨

送周思道朝議歸守漢州三絕

早緣民事失茶官解印重來十二年美惡一周還自
復始知東里解言天

梓漢東西甲乙州同時父子兩諸侯

正孺時出守梓州

它年

我作西歸計兄弟還能得此不

酒壓郾筒憶舊酤花傳丘老出新圖

漢州官酒蜀中推第一趙昌畫

花摸微丘文播亦西川所無也

此行真勝成都尹直為房公百頃湖

樂城集卷之十五

清夢軒

樂城集卷之十六

宋 西蜀蘓轍子由 著

明 東吳王執禮子敬 校

詩一百二十首

程之元表弟奉使江西次前年送赴楚州韻戲

別

送君守山陽羨君食淮魚送君使鍾陵羨君江上居
憐君喜為吏臨行不欵欵紛紛出歌舞綠髮照瓊梳
歸鞍踏涼月倒盡清樽餘嗟我病且衰兀然守文書
齒疎懶食肉一飯甘青蔬愛水亦已乾塵土生空渠

清貧雖非病簡易由無儲家使赤脚嫗何煩短轅車
君船繫東橋茲行尚徐徐對我竟不飲問君獨何歎
表弟程之邵奉議知泗州

馬有千里足所願百里程馬心自爲計安用終日行
何人志四方欲買千金輕吾弟有雋才見事心眼明
二年坐北部萬口傳佳聲談笑頑狡伏何曾用敲榜
艱難得銅虎洗眼長淮清民事不足爲但當食魚烹
負重貴餘力過飽多傷生不見大路馬垂頭畏繁纓

次韻子瞻書黃庭內景卷後贈蹇道士拱辰

君誦黃庭內外篇本欲洗心不求仙夜眠片月墮我
前黑氛剝盡朝日妍一暑一寒久自堅體中風行上
通天亭亭孤立孰傍緣至哉道師昔云然旣已得之
戒不傳知我此心未虧騫指我嬰兒藏谷淵言未絕
口行已旋我思其言夜不眠

次韻子瞻好頭赤

沿邊壯士生食肉小來騎馬不騎竹翩然赤手挑青
絲捷下巔崖試深谷牽入故關榆葉赤未慣中原暖
風日黃金絡頭依圍人俛聽北風懷所歷

送葆光蹇師遊廬山

建成市中有狂人縱酒罵市無與親敲門訪我何遠

巡頭蓬面垢氣甚真截河引水登崑崙下洗尺宅骨
髓勻告我入室要自門仙翁道師豈遺君歸來插足
九陌塵獨遊凝祥芳草春蕭然孤鶴鳴雞羣子欲不
死存谷神海山微明朝日暎丹成寄子勿妄云出入
無朕窮無垠相思一笑君乃信

同子瞻次梅聖俞舊韻題鄉舍木山

江槎出沒浮犀牛波濤掀天谷爲洲江寒水落驚霜
秋危根瘦節鳴寒流脆朽吹去誰鑄鏤連峯疊嶂立
酋酋吾家此山不易得十年棄置空自尤猿號鶴唳
豈無意委蛇恠我懷羔裘西歸父老拍手笑笑憶翁
子躬薪爨去時三山今有五不問故園惟一丘

次韻子瞻送千乘千能

少年食糠覈吐去願一官躬耕遇歛穫不知以爲歡
謂言一飛翔要勝終屈蟠朝廷未遑入江海失所安
多憂變華髮照影慙雙鸞恩從萬里歸獨喜大節完
日食太倉米篋中有餘統奇窮不當爾自信處此難
長女聞孀居將食淚滴槃老妻飽憂患悲吒摧心肝
西飛問黃鵠誰當救饑寒二子憐我老輦致心一寬
別久得會合喜極成辛酸忽聞倚門望有書驚歲闌
深情見緩急欲報非琅玕勸爾勤孝友慎母慕衣冠

淵渟自成井放瀉當生瀾豈有白雪駒舉足無和鑾

題王詵都尉畫山水橫卷三首

摩詰本詞客亦自名畫師平生出入輞川上鳥飛魚
泳嫌人知山光盎盎著眉睫水聲活活流肝脾行吟
坐詠皆自見飄然不作世俗詞高情不盡落縑素連
峯絕澗開重帷百年流落存一二錦囊玉軸酬不訾
誰令食肉貴公子不學父祖驅熊羆細氈淨几讀文
史落筆璀璨傳新詩青山長江豈君事一揮水墨光
淋漓手中五尺小橫卷天末萬里分毫釐謫官南出
止均穎此心通達無不之歸來纏裹任統綺天馬性

在終難羈人言摩詰是前世欲比顧老疑不癡桓公
崔公不可與但可與我寬衰遲

憐君將帥雖有種多君智慧初無師篇章俊發已可
駭丹青妙絕當誰知自言五色苦亂目況乃旨酒長
傷脾手狂但可時弄筆口病未免多微詞歌鐘一散
任池館幅巾靜坐空書帷偶從禪老得真趣此身不
足非財訾世間翻覆岸爲谷猛獸相食虎與羆逝將
得意比春夢獨取妙語傳清詩眼看宮釀瀉酥酪未
與村酒分醇漓解鞍駿馬空伏櫪寄書黃狗閑生釐
江山平日偶有得不自圖寫渾忘之臨窻展卷聊自

適盤礴豈復冠裳羈欲乘漁艇發吾與願入野寺嗟
兒癡行纏布襪雖已具山中父老應嫌遲

我昔得罪遷南夷性命頃刻存篙師風吹波蕩到官

舍號呼誰復相聞知小園畜蟻防橘蠹橘性甘多蠹南人畜蟻於

園中蟻緣木食蠹雖鄰家柯葉相接而蟻不相過亦一異耳空庭養蜂收蜜脾讀

書一生空自笑賣鹽竟日那復詞城中清溪可濯漱

城上連峯堪幕帷十千薄俸聊足用魚多米賤憂無

訾東坡居士最岑寂岌然深藜見狐羆坐隅止鵬偶

成賦槃中食暮時作詩憐君富貴可炙手一時出走

羞啜醑澤傍憔悴凡幾歲胸中芥蒂無一釐江山別

來今久矣不獨能言能畫之同朝執手不容久笑我

野馬方受羈袖中短卷墨猶濕傍人笑指吾儕癡方

求農圃救貧病它年未用譏樊遲

次韻子瞻十一月旦日鎖院賜酒及燭

銅鑲玉鎖閉空堂腕脫初驚筆札忙紅燭遙憐風雪

暗黃封微瀉桂椒香光明坐覺幽陰破溫暖深知覆

育長明日白麻傳好語曼聲微繞殿中央

送周正孺自考功郎中歸守梓潼兼簡呂元鈞

三絕

白髮熙寧老諍臣凜然心膽大於身吾儕坐看馮唐

去誰起雲中廢棄人

十年符竹守吾州故吏相逢嘲土牛母謂徐公不堪用諸人自與世沉浮

東道如聞近稍安乘驄按部凜生寒忽逢太守能相下俱是從來言事官

雪中訪王定國感舊

昔游都城歲方除飛雪紛紛落花絮徑走城東求故人馬蹄旋沒無尋處翰林詞人呼巨源笑談通夜倒清樽住在城西不能返醉臥吉祥朝日暎相逢却說十年事往事皆非隔生死惟有飛靈似昔時許君一醉那須起蘭亭俛仰迹已陳黃公酒壚愁殺人君知聚散翻覆手莫作吳楚乘朱輪

次韻王定國見贈

枯木無枝不記年寒灰誰遣強吹然南遷不折知非妄未老未閒愈覺賢屢出詩章新管籥偶開畫卷小山川簿書填委慙君甚撥去歸來粗了眠

王子難龍圖挽詞

帝子乘鸞已列仙遺芳留得衆孫賢俊科蚤與寒儒競禁從終償白髮年輦路聯鑣驚往事圃田回首泣新阡舊聞推歷知天命看熟黃梁定洒然

次韻李豸秀才來別子瞻仍謝惠馬二首

小床卧客笑元龍彈鋏無與下舍中五馬不辭分後
乘輕裘初許獎諸公隨人射虎氣終在徒步白頭心
頗同遙想據鞍橫梨處新詩一一建安風

呂司空挽詞三首

少年輕富貴一意在詩書共恨經綸晚纔收老病餘
寡言知德勝善應本中虛卒相承平業謳歌元祐初

其二

將相家聲近勲名晚歲隆給扶安舊德賜府壓羣公
不見彌縫迹空推翼戴功山公舊多可寒士泣清風

其三

罷郡來清潁微官憶宛丘顏垣那可住隱几若將休
復起民欣願全歸天不留世間反覆手有德竟無憂

公罷潁川退居於陳轍
為陳學官時請見焉

范蜀公挽詞三首

能言人盡爾有立世終稀憂國常先衆謀身亦勇歸
見竒初或笑要極未應非僅似西山老終身止食薇

其二

賦傳長嘯久書奏鑄鍾新共歎文章手終為禮樂人
遺風滿臺閣好語落簪紳欲取褒雄比終非骨鯁臣

其三

劔外東來日城西却住年高齋留寓宿旅食正蕭然
語愜聞投石詩新看涌泉清樽寄苦淚一洒萊墳前
范百嘉百歲昆仲挽詞二首

少年何敏銳才氣伏諸生展卷五行下揮毫萬字傾
百年殊未艾一病竟無成誰謂從夫子同開鬱鬱城
其二

季子尤高爽顏家早哭回白頭生便爾黃壤遽相催
舊草誰收拾新松剩挿栽悲傷有伯氏諸子尚嬰孩
安厚卿樞密母夫人挽詞二首

家起側微中身兼富貴終慈仁本宜壽勤約自成風
大府寧居久名邦賜沐雄共傳生子福仍指讀書功
其二

早歲參戎幙開門對粉牆初聞寡兄弟共羨好姑章
一別飛騰速全歸福祿長遺芳在子舍它日望巖廊

題李公麟山莊圖

并叙

伯時作龍眠山莊圖由建德館至垂雲泝著錄者
十六處自西而東凡數里巖嶠隱見泉源相屬山
行者路窮於此道南溪山清深秀峙可游者有四
曰勝金巖寶華巖陳彭深鵲源以其不可緒見也

故特著於後子瞻既爲之記又屬轍賦小詩凡二十章以繼摩詰輞川之作云

建德館

龍眠淥淨中微吟作雲雨幽人建德居知是清風主

墨禪堂

此心初無住每與物皆禪如何一丸墨舒卷化山川

華巖堂

佛口如瀾翻初無一正定畫作正定看於何是佛性

雲鄉閣

清溪便種稻秋晚連雲熟不待見新春西風鄉自足

發真塢

山開稍有路水放亦成川游人得所息真意方澹然

薌茅館

山居少華麗牽茅結淨屋此間不受塵幽人亦新沐

瓔珞巖

泉流逢石缺脉散成寶網水作瓔珞看山是如來想

樓雲室

石室空無主浮雲自去來人間春雨足歸意帶風雷

秘全庵

世道自破碎全理未嘗違溪山亦何有永覺平日非

延華洞

共恨春不長，逡巡就搖落。一見洞中天，真知世間惡。

澄元谷

石門日不下，潭鏡月長臨。細細溪風渡，相看識此心。

雨花巖

巖花不可攀，翔葉久未墮。忽下幽人前，知子觀空坐。

冷冷谷

層崖落飛泉，微風泛喬木。坐遣谷中人家，家有琴筑。

玉龍峽

白龍晝飲潭，脩尾掛石壁。幽人欲下看，雨雹晴相射。

觀音巖

倚崖開翠屏，臨潭置苔石。有所獨無人，君心得未得。

垂雲泚

未見垂雲泚，其如歸興何。路窮雙足熱，為我洗磐陀。

勝金巖

置馬步巖間，巖前得平地。肴蔬取行簾，粗飽有遺味。

寶華巖

團團寶華巖，重重陰珍木。歸來得商鼎，試鬻溪邊綠。

陳彭滌

蒼壁立精鐵，縣泉瀉天紳。山行見已久，指與未來人。

晚歲仍聞道臨終竟不疑外人傳一二猶得載銘詩
歐陽伯和仲純挽詞二首

之人雖蚤病對客每清言不信疾爲累要稱學有原
遽條視名器果旒指乾坤長短何須問傳家已抱孫

其二

仲氏氣無前爲文思湧泉飄然落筆地時出疾邪篇
柁榦要經雪驂騮行著鞭淒涼悲故客不及見華顛
奉使契丹二十八首

次莫州通判劉涇韻二首

北國亦知岐有夷何嘗烽火報驚危擁爐絕漠聞嘉

語緩帶臨邊出好詩約我一樽迎嗣歲待君三館已
多時從今無事唯須飲文字聲名人自知

平世功名路甚夷不勞談說更騎危早年拭目看成
賦近日收心聞琢詩古錦屢開新得句弊貂方競苦
寒時南還欲向春風飲塞柳凋枯恐未知

贈知雄州王崇拯二首

趙北燕南古戰場何年千里作方塘煙波坐覺胡塵
遠皮幣遙知國計長勝處舊聞荷覆水此行猶及蟹
經霜使君約我南來飲人日河橋柳正黃

生辰使例
以人日還

至雄

城裏都無一寸閑城頭野水四汗漫與君但對湖光
飲久病偏須酒令寬何氏溝塍布棋局李君智畧走
珠槃應存父老猶能說有意功名未必難

贈右番趙侍郎

霜須顧我十年兄朔漠陪公萬里行駢馬貂裘寒自
暖連牀龜息夜無聲同心便可忘苛禮異類猶應服
至誠行役雖勞思慮少會看梨棗及春生

古北口道中呈同事二首

獨臥繩牀已七年往來殊復少縈纏心游幽闕鳥飛
處身在中原山盡邊梁市朝回塵滿馬蜀江春近水

浮天枉將眼界疑心界不見中宵氣浩然

右趙侍郎

笑語相從正四人不須嗟歎久離羣及春煮菜過邊
郡賜火煎茶約細君日暖山蹊冬未雪寒生胡月夜
無雲明朝對飲思鄉嶺夷漢封疆自此分

右二副使

絕句二首

亂山環合疑無路小徑縈回長傍溪髣髴夢中尋蜀
道興州東谷鳳州西

日色映山才到地雪花鋪草不曾消晴寒不及陰寒

重攬篋猶存未著貂

過楊無敵廟

行祠寂寞寄關門野草猶知避血痕一敗可憐非戰
罪太剛嗟獨畏人言馳驅本爲中原用嘗享能令異
域尊我欲比君周子隱誅彤聊足慰中魂

燕山

燕山如長蛇千里限夷漢首銜西山麓尾掛東海岸
中開哆箕畢末路牽一線却顧沙漠平南來獨飛鴈
居民異風氣自古習耕戰上論召公奭禮樂比姬旦
次稱望諸君術畧亞狐管子丹號無策亦數游俠冠

割棄何人斯腥臊久不澣哀哉漢唐餘左衽今已半
玉帛非足云子女罹蹈踐區區用戎索久爾糜郡縣
從來帝王師要在侮亡亂攻堅甚攻玉乘瑕易冰泮
中原但常治敵勢要自變會當挽天河洗此生齒萬
趙君偶以微恙乘馳車而行戲贈二絕句

鄰國知公未可風雙馳借與兩輪紅它年出塞三千
騎臥畫輜車也要公

高屋寬箱虎豹裯相逢燕市不相親忽聞中有京華
語驚喜開簾笑殺人

會仙館二絕句

北嶂南屏恰四周西山微缺放溪流胡人置酒留連
客頗識峯巒是勝游

嶺上西行雙石人臨溪照水久逡巡低頭似愧南來
使居處雖高已失身

出山

燕疆不過古北關連山漸少多平田奚人自作草屋
住契丹駢車依水泉橐駝羊馬散川谷草枯水盡時
一遷漢人何年被流徙衣服漸變存語言力耕分穫
世為客賦役稀少聊偷安漢奚單弱契丹橫目視漢
使心淒然石塘竊位不傳子遺患燕薊逾百年仰頭

呼天問何罪自恨遠祖從祿山

此皆燕人語也

奚君

宅在中京南

奚君五畝宅封戶一成田故壘開都邑遺民雜漢編
不知臣僕賤漫喜殺生權燕俗嗟猶在婚姻未許連

惠州

傳聞南朝逃叛者多在其間

孤城千室閉重闔蒼奔平川絕四鄰漢使塵來空極
目沙場雪重欲無春羞歸應有李都尉念舊可憐徐
舍人會逐單于渭橋下歡呼齊拜屬車塵

神水館寄子瞻兄四絕

十一月二十六日是日大風

少年病肺不禁寒命出中朝敢避難莫倚阜貂欺朔

雪更催靈火煮鉛丹

馬上作李若芝守一法似有功

夜雨從來相對眠茲行萬里隔胡天試依北斗看南
斗始覺吳山在目前

誰將家集過幽都逢見胡人問大蘓莫把文章動蠻
貊恐妨談笑臥江湖

虜廷一意向中原言語綢繆禮亦虔顧我何功慙陸
賈橐裝聊復助歸田

木葉山

奚田可耕鑿遼土直沙漠蓬棘不復生條幹何由作
茲山亦沙阜短短見叢薄冰霜葉墮盡鳥獸紛無託

乾坤信廣大一氣均美惡胡為獨窮陋意似鄙夷落
民生亦復爾垢汙不知作君看齊魯間桑柘皆沃若
麥秋載萬箱蠶老簇千箔餘梁及狗彘衣被遍城郭
天工本何心地力不能博遂令堯舜仁獨不施禮樂

虜帳

虜帳冬住沙陀中索羊織韋稱行宮從官星散依冢
阜羶廬窟室欺霜風春梁煮雪安得飽擊兔射鹿夸
強雄朝廷經畧窮海宇歲遺繒絮消頑凶我來致命
適寒苦積雪向日堅不融聯翩歲旦有來使屈指已
復過奚封禮成即日卷廬帳釣魚射鵝滄海東秋山

既罷復來此往返歲歲如旋蓬
彎弓射獵本天性拱手朝會
愁心胸甘心五餌墮吾術勢
類畜鳥游樊籠祥符聖人會
天意至今燕趙常耕農爾曹
飲食自謂得豈識圖霸先和戎

十日南歸馬上口占呈同事

南轅初喜去龍庭入塞猶須閱
月行漢馬亦知歸意速朝賜
已作故人迎經冬舞雪長相
避屈指新春旋復生想見雄
州饋生菜菜盤酪粥任縱橫

傷足

少年謬聞道直往寡所疑不知避
礙嶮造次逢顛危

中歲飽憂患進退每自持長存鄙夫計未免達士嗤
前日使胡罷晝夜心南馳中塗冰塞川滉漾無津涯
僕夫執轡前我亦忘止之馬眩足不禁拉然臥中坻
異域非所息據鞍幾不支昔嘗誦楞嚴聞有乞食師
行乞遭毒刺痛劇侵肝脾念覺雖覺痛無痛痛覺知
念極良有見遂與凡夫辭我今亦悟此先佛豈見欺
但爾不卽證欲往常遲遲咄哉後來心當與初心期

春日寄內

春到燕山冰亦消歸驂迎日喜嫖姚久行胡地生華
髮初試東風脫弊貂插髻小幡應正爾點繁生菜爲

誰挑附書勤掃東園雪到日青梅未滿條

渡桑乾

北渡桑乾冰欲結心畏穹廬三尺雪南渡桑乾風始
和冰開易水應生波穹廬雪落我未到到時堅白如
磐陀會同出入凡十日腥羶酸薄不可食羊脩乳粥
差便人風隧沙場不宜客相攜走馬渡桑乾旌旆一
返無由還胡人送客不忍去久安和好依中原年年
相送桑乾上欲話白溝一惆悵

送文太師致仕還洛三首

國老無心豈爲身五年朝謁慰簪紳元臣事業通三
世舊將威名服四鄰遍閱後生真有道欲談前事恐
無人比公惟有凌雲檜歲歲何妨雨露新

齊魯元勳古太師寂寥千載恐無之昔歸暫縮經邦
手復起還當問道時人謁何曾須掖侍到家依舊擁
旌麾孔公靈壽固應在秋晚香山訪佛祠

西都風物漢唐餘天作溪山養退居盈尺好花扶几
杖拂天脩竹倚庭除白頭伴侶誰猶健率意壺殮久

已疎

公昔與司馬公同居洛下常與諸老
爲真率之會酒肴果蔬隨有而具

我欲試求

三畝宅從公它日賦歸歟

先人昔游洛中有十築之
意不肖常欲成就先志顧

未暇

李公麟陽關圖二絕

百年摩詰陽關語三疊嘉榮意外聲誰遣伯時開縞
素蕭條邊思坐中生

西出陽關萬里行彎弓走馬自忘生不堪未別一盃
酒長聽佳人泣渭城

學士院端午帖子二十七首

皇帝閣六首

溽暑避華構清風迎早朝楓槐高自舞冰雪晚初消
其二

南訛初應曆五日未生陰靈藥收農錄薰風拂舜琴

其三

皇心本夷曠一氣自炎涼不廢荆吳舊民風見未央
其四

九門已散秦醫藥百辟初頒凌室冰飲食祈君千萬
壽良辰更上辟兵繒

其五

雨遲麥粒尤堅好日麗蠶絲轉細長入夏民間初解
愠宮中時舉萬年觴

其六

汴上初無招屈亭沅湘近在國南垓太官漫解供新

稷諫列猶應記獨醒

太皇太后閣六首

決獄初迎雨開倉旋取陳青黃今接夏饑疫免憂春
其二

簾密風時度宮深日倍長紵羅隨節賜黍麥趁新嘗
其三

執熱寧忘濯清心自釋煩東朝聞好語畏日解餘暄
其四

出磨玉塵除舊廩捧箱綵縷看新絲一年豐樂今將
半兩殿歡聲外得知

其五

舟楫喧呼招屈處禽魚鼓舞放生中百官却拜臬爨
賜凶去方知舜有功

其六

殿清虛過暑天草廬煩促念民編外家近許遷新
遣司農費一錢

皇太后閣六首

壽康朝謁蚤長信燕閒多不有圖書樂其如晝漏何
其二

玉宇宜朱夏壺冰生晚涼深心念行暘清夜久焚香

其三

蠶宮罷採擷暴室獻朱黃翕呷霜純動闌班綵縷長

其四

六宮無事著嬉游百藥初成及早收苜歎還羞十二

節椿年自占八千秋

其五

萬壽仍縈長命縷虛心不著赤靈符民間風俗疑當

共天上清高定爾無

其六

揚子江心瀉鏡龍波如細縠不搖風宮中禁捧秋天

月長照人心助至公

皇太妃閣五首

曉起鐘猶凝朝回露欲乾逡巡下清蹕委曲問平安

其二

壓蔗出寒漿敲冰簇畫堂人間正祥暑天上絕清涼

其三

九夏清齋奉至尊消除癘疫去無痕太醫爭獻天師

艾瑞霧長縈堯母門

其四

統扇新栽冰雪餘清風不隔紵羅疎飛昇漫寫秦公

子榮謝應憐漢婕妤

其五

渺渺金河入禁垣
漸臺雨過碧波翻
共傳太液龍舟穩
不似南方競渡喧

夫人閣四首

脩夏欺晴日重簾
度細風羣仙不煩
促長在廣寒宮

其二

尋芳空茂木闌草
得幽蘭歌舞纖絺
健嬉游玉佩珊

其三

新煮青筠稻米香
旋抽獨爾薄羅光
剩堆雕俎添崖

窈窕作輕衫薦壽觴

其四

御溝遶殿細無聲
飛灑彤墀曉氣清
開到石榴花欲盡
陰陰高柳一蟬鳴

次韻門下劉侍郎直宿寄蘓左丞

雷雨連年起卧龍
穆然臺閣有清風
一時畫諾雖云舊
此日都俞本自公
松竹經霜俱不改
鹽梅共鼎固非同
一篇和遍東西府
六律更成十二宮

次韻張來學士病中二首

一卧憐君三十朝
呼醫仍苦禁城遙
靈根自逐新陽

癸卯集 卷一 三十一 生刻三百五
發病拚從經野火燒吻燥未須尋麩藥囊空誰與典
絺蕉何時匹馬隨街鼓睡起頻驚髀肉消

塵垢汗人朝復朝病中吟嘯夜方遙長空鴈過疑相
答虛幌螢飛坐恐燒稍覺新霜試松竹未應寒雨敗
梧蕉從來百鍊身如劒火滅重磨未遽銷

次韻張君病起二首

壯年得疾勢能支不廢霜螯左手持漸喜一杯留好
客未應五斗似當時口中舌在時間句雪裏心安不
問師去卧淮陽從病守功名他日許君期

老去生經廢不行鏡中白髮見空驚解將冲氣通枯
指易甚新陽發舊莖一悟少年難久恃不妨多病却
長生文章繆忝追前輩服食從來亦強名

身半守空草

亦思前鐘明余務務亦務務

皆易無事



